



Wantok

The Catholic Reporter *insait...*

Namba 2191 Septemba 8 - 14, 2016 28 pes Niuspepa Bilong Yumi Ol PNG Stret! **K1 tasol**

Business Printing Specials

- Common Seal Stamp** (Customer must produce Certificate of Incorporation) **K66 inc GST**
- 200 x Business Cards** (single sided) **K99 inc GST**
- 500 x Colour Letterheads** **K220 inc GST**

Prices valid until 31st October 2016

Only at... **THEODIST LTD** THE STATIONERY SUPERMARKET

Waigani Drive, POM Ph:313 9800 sales@theodist.com.pg
Markham Road, LAE Ph:472 5488 saleslae@theodist.com.pg

Conditions: - Printing only, editing / artwork fees may apply - 4pm next day Pick up (Mon-Fri)

Kendel lait i kukim haus na bagarapim laip - P4

Angore redi long mekim bisnis - P8

Suprim Kot kliaim PM O'Neill



Praim Minista O'Neill

PRAIM Minista Peter O'Neill bai no inap go long Lidasip Traibunel kot long gavman i bin kisim K3 bilien dinau mani long Union Bank of Switzerland (UBS).

Nesenel Eksekutiv Kaunsil (NEC) i bin tok orait long Mas 6, 2014 long gavman i kisim K3 bilien dinau mani long UBS invesmen benk long baim sea bilong Oil Search Limited, wanpela bikpela oil na ges kampani bilong PNG.

Faipela Suprim Kot Jas, em ol Deputi Sif Jastis Sir Gibbs Salika, Jatis Ambeng Kandakasi, Jastis Panuel Mogish, Jastis Stephen Kassman na Jastis Terence Higgins, i painimaut olsem Pablik Prosekuta i no bin bihainim lo long salim Mista O'Neill i go long Lidasip Traibunel.

Ol dispela 5-pela Suprim Kot Jas i autim dispela disisen long las wik Fraide. Dispela disisen i kliarim tingting bilong planti manmeri long kantri na ol wokman bilong gavman.

Suprim Kot i painimaut olsem Mista O'Neill o NEC i no bin brukim wanpela lo taim gavman i laik kisim dispela dinau mani long UBS.

Suprim Kot i painimaut olsem Ombudsman Komisnin i no bin givim nem bilong wanpela man o nem bilong wanpela ejensi, we gavman inap long tokim taim ol i laik kisim dispela dinau mani.

Suprim Kot i painimaut tu olsem Ombudsman Komisnin i no bin autim wanem lo Mista O'Neill o NEC i bin brukim long kisim dispela dinau mani.

Mista O'Neill i tok em i wan-

bel long dispela disisen bilong Suprim Kot bikos em i kliaim tingting bilong planti manmeri.

"Planti manmeri i ting mi brukim lo long kisim dispela mani long laik bilong mi yet. Nogat, gavman i bin kisim dispela dinau mani long baim sea long Oil Search Limited," Mista O'Neill i tok.

Mista O'Neill i tok Suprim Kot i luksave olsem dispela bisnis bilong gavman long baim sea long Oil Search em i wanpela intres bilong gavman na intres bilong pipel bilong dispela kantri.

Atoni Jeneral Ano Pala na tupela Nesenel Kot Jas, Jastis Collin Makail na Jastis David Cannings i bin kamapim dispela Suprim Kot refrens long sekim sapos Praim Minista O'Neill i asua o no gat.



BE A LUCKY WINNER TODAY!

CHECK-IN FAST! CHECK-IN ONLINE!

Be in the draw for a chance to win a trip for 2 to Pohnpei, Federated States of Micronesia, with accommodation. Be a smart traveller and check in Online today!

Check-in Online & Win
3 x draws! Oct, Nov & Dec

Air Niugini
www.airniugini.com.pg

Avoid the airport queue! Online Check-in is available on www.airniugini.com.pg from 24 hours to 3 hours before departure. Not available for flights departing Australia and Japan.

ASPA bai lukautim bas

ANGORE Special Purpose Authority (ASPA) bai lukautim tupela nupela bas we em i baim na givim long Idauwi na St John's Tukupawi praimeru skul insait long Hapaga LLG, Tari, Hela Provins.



Jeneral Menesa bilong ASPA, Hari John Akiye

"Ol papamama na tupela skul bai no inap yusim wanpela mani long ranim dispela bas. Sait bilong mekim mentensens na ranim operesen bai stap long han bilong ASPA.

"Mi laik tok tenkyu long Oil Search i wanbel long givim fri disel long mipela. Bai mipela i kisim fri disel dram long Nogoli, Oil Search bai givim yumi fri," Mista Akiye i tok.

Mista Akiye i tok ASPA bai

kamapim wanpela komiti bilong lukautim ran bilong dispel bas. Dispela komiti bai gat ol komiti memba i kam long ASPA na tupela skul.

"Tupela het masta bilong skul na Siaman bilong ASPA bai mekim disisen long larim husat i stap long dispela komiti na dispela komiti ba imekim plen bilong ran bilong bas olsem pika p, drop of, na rapela plen bilong ran bilong bas," Mista Akiye i tok.

Mista Akiye i tok dispela tupela bas i no famili bas o i no PMV bas we ol pablik i ken yusim.

"Em i bas bilong ol sumatin, i no pablik. Tambu tru long ol pablik i sindaun o yusim dispela bas. Em bilong ol skul pikinini husat i werim yunifom tasol, no gat yunifom, bai yu no inap sindaun long bas," Mista Akiye i tok.

Potape na Undialu i no bihainim lo



Memba bilong Komo-Margarima Francis Potape (raithan) na Memba bilong Korobal-Lake Kopiago, Philip Undialu, i toktok wantaim ol sapota long Tunde long Waigani kot haus.

NESENEL Kot long Waigani i tokim Hela Provinsal Asembli long sindaun gen na makim nupela ekting Gavana bilong Hela Provins.

Jastis Colin Makail i tokim Asembli Klak bilong Hela Provinsal Asembli long makim nupela taim gen na larim asembli i sindaun gen long ilektim nupela ekting gavana.

Em i mekim dispela tok tok long Tunde dispela wik taim em i givim disisen bilong kot long hevi bilong tupela memba long Hela i resis long kamap ekting gavana.

Sia bilong Gavana bilong Hela i stap nating taim Anderson Agiru i bin dai long Epril 28, 2016.

Nesanel Kot i tok Deputi Gavana Thomas Potape bai kamap siaman bilong dispela bung we ol bai makim nupela ekting gavana.

Kot i painimaut olsem Memba bilong Koroba-

Lake Kopiago, Philip Undialu na Memba bilong Komo-Margarima, Francis Potape i no bin bihainim stretpela rot aninit long Standing Oda long larim ol memba bilong haus ov asembli i makim tupela i kamap ekting gavana.

Ol memba bilong Hela Provinsal Asembli i bin bung on Jun 28. Ol i bin plen long makim nupela gavana long dispela taim tasol bihain ol i skruim bung i go moa long Julai 5.

Long 10 klok moning long Julai 5, namba wan grup bilong asembli memba i makim Mista Undialu i kamap ekting gavana. Asembli Klak Watson Ebela i bin kamap siaman bilong dispela miting.

Kot i tok dispela i no stret na Undialu i brukim lo long larim Asembli Klak i kamap siaman bilong bung bikos em i egesim Standing Oda.

Long 2 klok apinun,

Deputi Gavana Thomas Potape i bin kamap siaman bilong asembli miting na narapela grup bilong asembli memba i makim Komo-Margarima MP Potape i kamap nupela ekting gavana.

Kot i painimaut olsem Memba Potape na Deputi Gavana Potape i brukim lo bikos ol i bin pasim tok long bung long 10 klok moning, i no 2-klok apinun.

"Mi painimaut olsem tupela sait wantaim i asua na tupela sait wantaim i no bin bihainim gut ol Standing Oda bilong Provinsal Haus ov Asembli. Mista Potape i no gavana, na Mista Undialu i no gavana," Jastis Makail i tok.

Kot i painimaut olsem ileksen bilong tupela wantaim i no bin bihainim lo na ol Standing Oda. Kot i tokim provinsal asembli long holim wanpela miting gen long makim nupela ekting gavana.

OTML helpim haus slip bilong DWU sumatin



OTML MD na CEO Peter Graham katim riben long opim nupela haus bilong slip bilong ol DWU RHS sumatin long Tabubil.

OK Tedi Mining Limited (OTML) na Divine Word University (DWU) i wok bung wantaim long kamapim gutpela helt standet long ol helt sevis long Not Flai Distrik bilong Westen Provins, wantaim ol klasrum na ol ples bilong ol sumatin bilong helt saiens i lainim wok.

Wantaim dispela patnasip, OTML i putim K11 milien

kina aninit long takis kredit skim bilong en, long kirapim tupela nupela haus slip bilong ol sumatin long las mun.

OTML na Diwai Pharmaceutical Limited (DPHL), wanpela bisnis han bilong Divine Word Yuni-versiti, husat i save menesim Tabubil haus sik long makim OTML, bungim han wantaim long opim tupela haus slip bilong ol sumatin.

OTML Menesing

Dairekta na Sif Ek-sekyutiv Opisa Peter Graham na Divine Word University Dean bilong Fekalti bilong Marasin na Helt Saiens, Profesa Clement Malau i bin katim riben long opim dispela haus slip na tu long makim nupela taim bilong wok poroman.

Tupela nupela haus i gat 16 rum, rum bilong wasim klos, stua rum na toi-

let na rum waswas.

Wantaim ol haus slip bilong ol sumatin ol i bin wokim tupela narapela haus tu na wanpela klasrum na haus slip bilong ol wokman na wokmeri wantaim K11 milien i kam long takis kredit skim bilong OTML.

Dispela taim tu DWU Rurel Helt Saiens i statim nupela Wok Plesmen Program bilong en.

Madang taun wod 5 kaunsila wokim rekot bilong wod

James G. Kila i raitim

WANPELA eben wod kaunsila long Madang taun i bin kamapim nupela samting stret long wokim kamap rekot o profail bilong wod 5 insait long Madang eben LLG.

Wod 5 kaunsila, Ambrose Basse i bin yusim ol lain volantia long helpim em long wok sevei o askim long kisim namba bilong olgeta setelmen, bisnis haus, residensial haus, ol skul na gavman institusen, ol blokholda na ol praiwet bisnis insait long wod bilong em.

Mista Basse i tok olsem dispela em namba wan sevei long wokim profail bilong wod 5 insait long Madang eben LLG na bikpela samting em long kamapim rekot bilong husat lain i stap insait long wod 5 na bihain ol plen long wokim developmen bai i

ken kamapi isi.

Mista Basse i tok narapela as bilong wokim kamap dispela sevei long mun Jun na ran kam long mun Ogas em long helpim em long ol developmen plen, na tu soim rekot bilong ol manmeri na bisnis haus na pipel long wod 5 insait long taun atoriti.

Em i tok insait long 20 na 30 yia i go pinis, wod 5 i no bin gat gutpela data o rekot long hamas pipel, bisnis haus, skul, gavman institusen i stap insait long baunderi bilong en. Olsem na dispela sevei em bikpela samting tru biks em bai ol data o rekot we ol plena bai nidim long bihain long kamapim developmen insait long wod 5 eria.


Mista Basse i tok olsem Ogenik Lo bilong Provinsal na Lokal Level gavman i askim olsem olgeta wod i

mas gat faiv (5) yia wok plen bilong ol long stiarim developmen. Tasol dispela i no save kamap long planti ol wod insait long kantri.

Em i tok wanem samting em i wokim em wok bilong Madang Taun Atoriti, tasol ol no bin wokim olsem na em i kisim dispela wok nau na kisim sampela helpim i kam long MULLG.

Mista Basse i tok em bai serim wanem infomesin em i kisim long sevei wantaim ol bisnis haus insait long wod 5 long Madang taun na Nesanel Hausing Kopresen na Madang provinsal gavman na ol arapela stekholda.

Em i tok dispela rekot bilong wod em bikpela samting tru bikos wanem infomesin ol i kisim bai helpim long kamapim developmen plen.



Bai yu mekim planti moa skon na kamapim moa moni

Mekim ol skon bilon maket wantaim flour ol trupla lain bilong bakeri save usim



Vitamin E
Flame
goodman fielder
25kg NET WEIGHT

Ol Jenelis kisim Divevelopmen nius trening

Frieda Sila Kana i raitim

FIFTIN nius ripota bilong sikpela midia kampani long PNG i bin kisim wanpela trening bilong raitim ol divevelopmen nius long Pot Mosbi las wik.

Dispela trening em tupela saveman ripota bilong Thomson Reuters Faundesen i bin ranim wantaim helpim bilong Yunaitet Nesens na Midia Kaunsil bilong PNG. Tren- ing i bin stat long 29 Ogas na i bin pinis long Sep- temba 2.

Ol nius ripota husat i bin kamap em ol ripota bi- long televisen, redio, nius- pepa na nius long internet. Ol lain i kisim trening i bin lainim gen ol gutpela we bilong raitim ol nius stori na tu long lainim wei bi- long tanim ol bikpela di- velopmen ripot olsem Milenium Divevelopmen Gol wantaim Sastenebel Divevelopmen Gol, rait bi-

long ol pikinini na ol risets ripot bilong ol NGO na gavman long kamap olsem nius we ol manmeri nating inap long ritim na luksave long ol hevi o long ol rot we mani bilong kantri i save go long en.

Trena i go pas em Michael Rose bilong Aus- tralia Pres Klap. Em i gat 35 yia ekspirians long wok olsem nius ripota, edita na brodkasta long ol bikpela midia ogena- ing na bin stat long 29 Ogas na i bin pinis long Sep- temba 2.

Ol fiftin jenelis i bin kisim wanpela setifiket bi- long trening long Fraide 2 Septemba we Residen Kodinetabilong Yunaitet Nesens long kantri, Roy Trivedy na Presiden bi- long Midia Kaunsil PNG,

Alexander Rheneey i bin givim ol.

Thomas Reuters em i wanpela bikpela nem nius ogenaimesen long wol na Presiden bilong Midia Kaunsil i tok amamas tru long taim bilong ol tupela trena long helpim mak bi- long nius wok long PNG long kamap gut.

Em i wok olsem senia jenelis wantaim ol biknem kampani olsem Sydney Morning Herald. Em i Sif sab-edita long Wol Des long Reuters long London. Wok bilong em nau em i stap olsem Dairekta bi- long Risets na Komyunike- sen long Australia Pres Kaunsil long Sydney.

Michael i bin holim ol kain trening kos olsem long ol jenelis husat i save wok long ol niuspepa long ol kantri long Afrika, Esia na Yurop. Em i bin raitim sikspela buk na em i bin go pinis long 75 kantri.

Tupela skul long Angore kisim nupela bas



Ol sumatin i bilas na sanap fran long tupela nupela bas

OL skul sumatin bi- long Idauwi na St. John's Tukupawi praimer skul insait long Hayapuga lokal level gavman (LLG) eria long Tari-Pori distrik, Hela Provins bai no moa wok- about long skul.

Dispela em bikos Angore Special Pur- pose Authority (ASPA) i baim tupela nupela 25-sita kosta bas na givim i go long dispela tupela praimer skul long las wik Fraide.

Evangelical Church of PNG (ECPNG Sios) i ranim Idauwi praimer skul na Kato- lik Sios i ranim St John's Tukupawi praimer skul.

Tupela praimer skul i stap insait long Angore Petroleum Di- velopmen Laisens (PDL) 8 eria bilong PNG LNG Projek.

ASPA i givim dispela tupela bas long helpim tupela skul i pikim ol skul pikinini long monin na dropim ol long api- nun.

Dispela em i namba wan taim long skul long Hela provins i kisim bas. ASPA i kamap namba wan spesel pepes atoriti long baim skul bas na givim long skul.

Ol arapela spesel pepes atoriti insait

long Hela na Sauten Hailens provins i no bin baim skul bas na givim long skul tasol ASPA i kamap namba wan spesel pepes atoriti long givim dis- pela kain helpim long tupela skul.

Long las wik Fraide long Idauwi skul graun, bikpela ren i bin pundaun tasol dispela i no bin stopim moa long 1, 000 manmeri long soim amamas long kisim dispela tupela nupela bas.

Ol skul sumatin, ol tisa, wokman bilong Hela provinsal admin- istresen, ol wok dairekta bilong ASPA, ol asples manmeri na ol polisman i bin bung long Idauwi praimer skul graun lopng wit- nesim presentesen seremoni bilong dis- pela tupela bas.

Siaman bilong ASPA, Peter Haluma, i salensim ol manmeri long Angore long lukautim dispela bas na rispektim tupela bas olsem pablik propeti.

"Dispela em i namba wan sevis ASPA i givim long ol pipel bilong Angore. Wanpela NEC disisen i bin kamapim ASPA las yia tasol na mipela i amamas olsem nau tupela skul bilong yumi i kisim dispela nupela bas.

"Oil na ges bai pinis tasol edukesen bai stap yet, dispela tu- pela skul bai stap yet. Mipela i amamas long inves long edukesen bilong pikinini bilong mipela," Mista Haluma i tok.

ASPA i baim dispela tupela bas long mani mak K380, 000. Dis- pela bas i gat ol sam- ting olsem (3) paia ekstinguisa, eakon, GPS trekking sistem, FM redio, na bai gat tupela sekyuriti o bus kru long lukautim bas taim em i mekim run bilong em.

Oil Search i wanbel long givim fiul o disil long sapatim ran bi- long dispela tupela bas. Ol arapela mani o operesen bilong kar bai stap long han bi- long ASPA bikos dis- pela em i projek bilong ASPA.

Lukautim gavman sevis gut

WANPELA senia opisa bi- long Dipatmen ov Nesenel Plening na Monitaring i salenisim ol manmeri long Angore long lukautim ol pablik propeti.

Fes Asisten Seketeri (FAS) bilong National Plening Dipatmen, Koney Samuel, i tokim ol man- meri long Angore olsem sapos ol i lukautim ol liklik sevis gavman bai amamas long givim moa sevis.

Mista Samuel i mekim dispela toktok long Idauwi praimer skul long las wik Fraide taim Angore Special Purpose Authority (ASPA) i baim tupela nupela bas na givim i go long Idauwi na St John's Tukupawi praimer skul.

Dispela tupela praimer skul i stap insait long Haya- puga LLG, Tari-Pori distrik,



Mista Koney Samuel i tok- tok long Angore

Hela Provins, na tu insait long Angore PDL 8 aninit long PNG LNG Projek ap- strim eria.

ASPA i bin baim dispela tupela bas long K380, 000 na givim i go long dispela tupela skul long helpim ol skul pikinini i yusim long go kam long skul.

"Dispela em i wanpela

bikpela samting ASPA i mekim. Dispela sevis bai helpim ol skul pikinini bi- long yumi long Angore. Planti bilong yumi bai ting em i liklik helpim tasol nogat, em i bikpela sam- ting.

"Mi amamas long ASPA i baim dispela bas na givim i go long tupela skul. Dis- pela i soim olsem yumi mas helpim ol sumatin bi- long yumi long wanem kain liklik wei mipela i ken," Mista Samuel i tok.

Em i tok mekim inves- men long ol skul pikinini em i wanpela bikpela samting dispela kantri i mas mekim.

"Bihain taim bilong dis- pela kantri i stap long han bilong ol pikinini bilong yumi. Yumi mas sapatim ol pikinini long skul gut na

kisim gutpela save.

"Ol komyuniti bilong yumi bai stap long han bi- long ol long bihan taim," Mista Samuel i tok.

Em i tok dispela tupela bas em i stat long planti nupela projek Dipatmen ov Nesenel Plening na Monitaring bai givim long ASPA long kirapim Angore na senisim laip bilong manmeri.

Tasol Mista Samuel i salensim ol manmeri long lukautim ol liklik sevis bikos baksait long liklik, bikpela i save kam sapos ol manmeri i lukatim gut.

"Taim mipela i tok long divevelopmen, em i save stat liklik na kampa bikpela long bihain taim. Olsem na mi laik askim ol komyuniti long hia long lukautim dis- pela tupela bas," em i tok.

SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the **Smart Business** current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer



WE ARE **BSP**

NSO holim midia woksop

NESENEL Stetistiks Opis (NSO) i bin holim wanpela woksop bilong ol midia o nius kampani long kism moa save long wanem kain wok we NSO i save mekim insait long kantri.

Dispela woksop i bin kamap long Fraide Septemba 2 long Pot Mosbi na em i tokaut long ol nius ripota long ol proses na prosida o ol rot we em i save bihainim long bungim na sekim gut ol kain kain data o ripot, pastaim long ol i go aut long nius.

NSO em i stetistik atoriti bilong gavman we i gat bikipela wok long developmen bikos ol stetistik o ol namba we em i gat i bilong ol Stet Ejensi na ol praiwet ogenaisesen long yusim

long mekim ol wok bilong ol gut.

Ol namba we ol ripot bilong NSO i kamapim em ol lain olsem i save yusim; Benk ov Papua Niugini, Dipatmen ov Fainens, Dipatmen ov Treseri na Dipatmen ov Nesenel Plening na Monitaring na ol i save yusim long wokim ol plen bilong ol na long sekim mak blong wok developmen long Papua Niugini.

Benk ov PNG i save yusim ol data o ripot bilong NSO long wokim fokus o lukluk i go pas long Gros Domestik Prodak (GDP) na Konsiuma Prais Indeks (CPI) long ol Mani Polisi Stetmen bilong en we ol i save putim long ol niuspepa

long pablik bai lukim.

Em i gutpela samting long save long wanem gutpela wok NSO i save mekim long bungim ol kain kain ripot na namba na kamapim ol namba bilong helpim wok developmen. Wanpela piksa olsem buai na daka we i stap insait long ol samting we ol i save yusim long makim prais bilong ol samting i go antap na kam daun o Konsiuma Prais Indeks (CPI).

Tasol NSO i wok long kism yet tok bilas long em i no save givm aut inap infomesen o toksave bilong wanem em i save sot long mani bilong mekim wok.

Nesenel Stetistikal Opis bai karimaut wanpela Demografik na Helt Sevei



: Ol wokman na wokmeri bilong NSO wantaim ol nius ripota i stap long namba wan NSO Midia Woksop las wik.

Provinsal Trening long namba 12 de i go inap long namba 26 de bilong mun Septemba 2016 insait long olgeta 22

provins. As bilong dispela Trening em bilong trenim ol fil pesenel o intaviua bilong 2016

Demografik na Helt Sevei Rolaut skeduel namel long mun Septemba na Desemba, 2016

Kendel lait i kukim haus na bagarapim laip

PASIN bilong laitim kendel insait long ol haus long ol seltelmen long kantri i save bagarapim planti laip na sindaun bilong ol pipel.

Long Ogas August 2016 samting olsem 1 klok long bikipela moning taim, wanpela paia i bin kirap insait long haus na i kukim 4-pela haus olgeta insait long 5-Mail Setelmen long

Kanage Strit, Pot Mosbi siti. Kes mani K2,000 na ol samting long mak bilnog K20,000 i go long K30,000 i lus long paia.

Dispela paia em i kirap long wanpela stik kendel tasol we ol i bin laitim na putim antap long wanpela karasin stov. Taim kendel lait i pinis orait, kendel stik i melt i go daun na kism

karasin insait long stov. Wantu tasol bikipela paia lait i kirap na i kism olgeta hap bilong dispela haus na i go long ol narapela haus i stap klostu.

Ol pipel i kirap hariap na ranawe lusim ol haus bilong ol na i no gat wanpela dai i kamap long paia. Ol famili i lusim olgeta samting bilong ol long paia.

I gat 37 pipel i kism hevi, we i gat 8-pela marit lain, tupela singel man na meri na tripela pikinini krismas bilong ol 3 i go 5 yia. Wanpela bilong ol dispela lain em i sumatin long gret 8 long 6-Mail Holi Rosari Praimeri Skul.

Wanpela man husat i ran go bek long sevim pikinini man bilong en, i kism paia long baksait na nek bilong en. Em i amamas long i stap laip tasol em i sori tru long lusim olgeta samting bilong em long wok long dispela paia. Ol samting em i lusim em olsem draiva laisens, proposal bilong komyuniti developmen na paspot bilong em yet na meri bilong en wantaim. Em i save wok misin wantaim meri bilong en, olsem na tupela i save raun go ovasis.

Meri bilong dispela man i save gat ol tumbuna klos we em i save larim ol arapela lain i rentim long taim bilong singsing na bilas tumbuna na em i save kism mani long dispela, tasol nau paia i



Dispela man i kism paia long baksait bilong en taim em i ran go bek long kism pikinini boi long haus i paia.

kukim olgeta.

Dispela famili i lusim samting olsem k10,000 propeti na K2000 kes mani. Ol i no gat narapela hap moa we ol i haitim mani bilong ol.

Narapela man husat i kism hevi na i stori em i wanpela viles kot mejistret na siaman bilong 27 viles kot insait long Nesenel Kepital Distrik, Snowai Gabriel. Mista Gabriel i tok, haus bilong en i stap long narapela sait bilong dispela haus i paia pastaim. Tasol paia i go yet na kism haus bilong em tu.

Meri bilong en i slip long veranda na i singaut taim

paia i kam klostu. Olsem na em i kirapim olgeta famili na ol i ranawe. Klostu pikinini meri bilong en i paia bikos em i bin slip yet insait taim ol mama na papa i ranawe. Tasol papa i ran i go bek na kism em.

Mista Gabriel i tok em i lusim olgeta laip na wok pepa bilong em. Meri bilong em i save wokim na salim bilum long kism mani tasol nau em i lusim 41 bilum olgeta long paia. Mani mak bilong ol dispela bilum i stap long K4000-K5000 tasol nau ol i kamap asis nating. Haus na ol samting insait na ol

samting bilong painim mani we famili i lusim em i stap long mak bilong K10, 000.

Ol dispela famili wantaim ol liklik pikinini nau i stap long wari na ol i nidim helpim long go bek long nomol laip bilong ol gen bikos olgeta samting ol i save yusim long sindaun bilong ol em i paia pinis.

Ol i askim ol pablik, ol bisnis haus na wan wan manmeri long helpim sapos ol i nap long helpim ol.

Husat i laik helpim i ken toktok wantaim Leslie Bentz long *Wantok Niuspepa*.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavisor bilong mipela long Fon: **325 2500 o Mobail namba: 7384 6688 o email i kam long: seovo@wantokniuspepa.com**

Ok Tedi na DWU statim wok plesmen program

OL 3rd yia sumatin bilong Divain Wod Yunivesiti (DWU) RHS Rurel Helt Saiens i bin statim plesmen program bilong ol long las mun wantaim 10-pela man na 10-pela meri sumatin bilong DWU i bin go kamap long Tabubil long statim 10-pela wik bilong stap na lainim wok stret long wok ples.

Na long taim ol sumtain i go kamap, OTML wantaim DWU i bin opim ol sumatin haus slip yunit long makim dispela RHS Wok Plesmen Program i stat.

Wantaim dispela wok plesmen ol sumatin bai wok long Tabubil Haus sik, Tabubil Eben Klinik, 4-pela main viles etpos, Matkonai helt senta arere long Tabubil Kiunga Haiwe na Monfort helt senta long Kiunga.

Profesa Clement Malau husat i bin lonsim DWU RHS wok plesmen program i givim tok salens long ol sumatin long ol i mas opim tingting bilong ol long sevim ol rurel pipel bilong Westen provins.

OTML Menesing Dairekta na CEO Peter Graham i tok olsem maining kampani i gat gutpela patnasip wantaim DPHL long menesim wok bilong Tabubil haus sik na long bringim klinik na pablik



DWU 3rd yia RHS sumatin wantiam Kodineta bilong ol Frank Yaghe (putim orens ves) na Profesa Clement Malau wantaim OTML CEO Peter Graham na Tabubil Haus Edministreta, Margareth Samei i sanap long fran bilong haus slip bilong ol man na meri sumatin.

helt sevise long ol wokman na wokmeri bilong kampani na tu long ol komyuniti i stap klostu long main.

Em i tok edukesen na helt em i namba wan invesmen bilong OTML long komyuniti bikos kampani i gat bilip olsem ol pipel em i

bikpela samting long laip bilong kampani.

Mista Graham i givim salens long ol sumatin long kamap helt ke profesenel na strongim ol long wok long ol rurel ples i stap longwe long taun we i gat bikpela

nid tasol ples bilong wok i no save gutpela tumas.

"PNG i sot long ol dokta husat i gat gutpela trening, ol nes na ol helt eksetensen opisa long ol rurel eria.

"Mipela i amamas long sapotim

wok bilong DWU long bringim helt ke edukesen bilong en wantaim ol fasiliti we bai mekim ol sumatin na ol profesenel i painim isi long kam long dispela hap." Mista Graham i tok.

"Mipela hop olsem dispela ekspirians long Tabubil bai mekim ol sumatin i gat laik long go bek gen long Westen Provins bihain long ol i greduet. Mi bilip ol dispela namba wan lain sumatin bai kamap gutpela piksa," Mista Graham i tok.

Edministreta bilong Tabubil Haus sik, Margareth Samei, i tok wok plesmen program em i bin kamap tupela yia i go pinis taim pastaim DWU Presiden, Fr. Jan Czuba i gat bikpela laik na visen long gat ol gutpela helt fasiliti i stap long ol rurel ples we ol pipel i stap longwe tru long ol sevis.

Em i tok wok plesmen program em i wanpela praivet pablik patnasip bilong bringim ol pablik sevis wantaim wanbel bilong OTML na DWU long yusim Tabubil Haus sik bilong ol sumatin i ken wok.

"Long Janueri 2014 OTML i bin givim helt sevis menesmen bilong Tabubil Haus sik i go long DWU," Mis Samei i tok.

Ol refuji long Jordan-Syria boda i kisim taim

PLANTI tausen ol refuji husat i pas namel long ples wesana long boda bilong Jordon wantaim Syria i kisim taim stret. Ripot bilong ol aid woka i tok ol dispela lain i pas i stap inap tupela mun nau na ol i wok long sot tru long kaikai na wara. Ol i pret bai sik i kamap namel long ol.

Ol dispela refuji i no gat gutpela wara saplai, o toilet na helt sevis na sindaun bilong ol i nogut tru long ol refuji husat i ranawe lusim Syria bikos long sivil woa i stap inap 5-pela yia nau.

Ol ektivis i tok dispela samting bai daunim poin bilong Jordon husat bai go pas long wanpela bikpela miting we ol kantri bai toktok long ol refuji. Dispela miting bai kamap long New York long dispela mun.

Ol ripot bilong Yunaitet Nesenes (UN) i tok namba bilong ol meri na pikinini i bikpela tru namel long ol dispela lain refuji husat i stap nabaut long ples wesana.

Ol i stopim ol lain long kalapim boda na go insait na helpim ol dispela refuji. Ol i stopim tu ol kaikai saplai na wara i sot tru long dispela ples we hat bilong san i stap long mak bilong 50c (122F) long taim bilong sama na i no gat wara bilong waswas.

Sampela refuji i wok long digim hul long wesana na hait long taim bilong strongpela win bikos ol i no gat narapela samting long stopim wanpela i bagarapim ol. Long mun Julai, balus bilong Rusia i bin bomim wanpela bilong ol dispela refuji setelmen.

"Dispela em sampela ples nogut tru long graun. Na nau i no gat helt sevis o inap kaikai na wara, na ol balus i tromoi bom," Natalie Thurtle, medikol tim lida bilong seriti

Wol Nius

grup, Médecins Sans Frontières (MSF) i tok.

Em i tok dispela em i wanpela bikpela imejensi tru long helpim ol pipel."

Jordan bai go pas long wanpela bikpela Intenesenel Lidas Samit long ol refuji long Septemba 20, long taim bilong UN jeneral asembli. Planti toktok i kamap long dispela bikos Jordon i no mekim gut long ol refuji husat i stap long boda bilong en. Ripot i tok i gat samting olsem 80,000 refuji i stap long ol dispela kemp.

"Jordon i laik soim olsem em i ken go pas long ol wok bilong stretim hevi bilong ol refuji bilong Syria, tasol long taim planti tausen refuji i pas long boda bilong en we i no gat wara na kaikai na helt sevis, no gat kantri bai bilip long ol toktok bilong en," Neil Sammonds, wanpela risetsa bilong Amnesti Intenesenel long Syria, Lebanon na Jordon i tok. Jordon i tok em i kisim 1.4 milien refuji bilong Syria we 630,000 i rejista wantaim UN. Jordon yet i kisim taim bikos em i mas lukautim planti pipel tru na ol i wari tu long sekyuriti bilong kantri.

Namba bilong ol pipel i stat long kamap bikpela bihain long Jordon i pasim boda bilong en wantaim Syria long mun Novemba las yia. Bipo ol dispela lain i ken go insait long Jordon, tasaol bikos boda i pas, ol i wok long bung nabaut long graun we i gat disput long en, ol i kolim 'the berm' bihain long ol wesana maunten i stap klostu long ples we ol refuji i wokim kemp long en.



Dispela poto bilong mun Me i soim ol refuji bilong Syria i kalapim boda i go insait long Jordan.

"Ol i no gat rot nau. Ol i no inap muv i gohet na ol i no inap tanim na go bek long Syria," Thurtle i tok.

Las wik Stephen O'Brien, andaseketeri bilong UN long humeniterien afeas i bin go lukluk raun long not Jordon na i stori long raun bilong em.

"Namel long tupela berm i gat planti tausen haus kandis na ol manmeri, i no olsem ol arapela refuji kem gavman i luksave long ol," em i tok.

'Traim tingim wanem kain sindaun bilong ol dispela pipel, namel long ples wesana we ples i save hat nogut tru, ol i mas tan insait long ol dispela kandis."

Long mun Me, gavman i larim sampela aid lain i go insait wantaim kaikai, wara na marasin. Ol MSF tim i save spendim 6-pela aua long wan wan de longdraivim mobail klinik i go long ol 'sevis eria' arere long re-

fuji kemp.

'I gat planti salens, mipela save lusim taun long 6 klok moning na draiv 3 o 4 aua long mekim ol wok, sampela taim mipela i lusim rot na bihain bai mipela i mas draiv bek gen i go long kemp bilong mipela,' wanpela memba bilong MSF tim i tok.

Tasol long mun Jun, gavman i stopim ol bikos long ol hevi bilong sekyuriti. Ol Islamik Stet militen i draivim wanpela suisaid bom long sekpoin bilong ami bilong Jordon na kilim 6-pela soldia. Tasol Sammonda i tok ol lain refuji i no stap insait long dispela hevi.

"Dispela suidaid kar i kam long not hap na em i bin spit tru na i no gat wanpela refuji i save long ol dispela lain," em i tok.

"Mi bilip Jordon i yusim dispela hevi long kamapim politiks na pasim boda bilong en."

Long Jun, gavman i givim tok orait long ol i kisim wanpela sik manki i go insait long Jordon na larim ol aid grup husat i wari long ol pipel i dai long hangre, long yusim krein long dropim kaikai i go daun. Em long ogas 4. Ol i no inap save sapos ol lain refuji i skelim gut kaikai. I no gat moa sans long bod i op gen.

I gat ol ripott i tok sik malnutrisen i kamap bikpela na i wara i sot tru. Samting olsem 5 o 6 lita long wanpela man. Dispela mak i no inap bikos ples i save hat tru. I no gat wara bilong waswas na wasim ol samting olsem na sik i kamap nau.

Thurtle i tok sik hepitaits i kamap pinis. 'Mipela i no lukim tasol mi bilip sik i kamap pinis,' em i tok.

Ol ripot i tok i gat 30 pipel i kisim sik jondis long wan wan de na 10pela pipel i dai long las mun. Sik Hepitaits B i birua long ol meri i bel, we namel long 20 na 25 pesen meri i save dai na mipela i kisim ripot pinis olsem sampela meri i dai long taim ol i karim bebi.

Thurtle em i wanpela bilong ol lain husat i sambai tasol klostu long boda, na i wok long kempen long gavman bilong Jordon i larim ol i go helpim ol refuji na em i wok long tok save long ol arapela kantri long hevi bilong ol dispela refuji long boda bilong Jordon na Syria.

'I luk olsem no gat man i wari long laip bilong ol. Mi yet na ol arapela lain i no lukim ol inap 8-pela wik nau. Em i isi long olgeta manmeri i lusim ting long ol, gavman bilong Jordon na ol arapela manmeri tu."

Nupela helt pos long Emagave

Loutova Siapea i raitim

EMAGAVE hauslain long Daulo Distrik bilong Isten Hailans provins nau i gat wanpela helt pos we bai sevim laip bilong ol mama long karim pikinini, na long helpim olgeta pipel wantaim helt sevis.

Betty James, het tisa long Hewe praimer skul long Emagave hauslain i tok sampela taim i go pinis, em i bin lukim wanpela mama i bin dai long taim bilong karim bebi.

Misis James i tok em i bin lukim dispela meri i laik karim bebi na i painim hat olsem na ol man na meri long ples i bin traime long karim em i go long helt senta,

tasol em i karim long rot taim ol i go yet. Dispela meri i dai bikos em i lusim planti blut.

Ol dispela kain hevi long helt i stap long ol kain ples olsem Emagave bikos i no gat wanpela helt pos, helt senta o haus sik long eria bilong ol.

Misis James i tok, i luk olsem planti ol mama wantaim ol pikinini i mas lusim laip bilong ol long kain pasin long ol yia i go pinis.

Tasol dispela kain hevi bai i no kamap moa long Emagave bikos nau ol pipel i pasim tingting na wantaim helpim bilong ol NGO grup na gavman, ol i kirapim wanpela haus bilong helt pos long Emagave hauslain.

Ekting Sif Eksekutiv Opisa bilong Isten Hailans Provinsal Helt Atoriti EHPHA, Joshua Soso husat i bin kamap olsem opisel ges ov ona long opim Emagave Komyuniti Helt Pos i tok, em i tru olsem planti hevi na laip tu i lus pinis.

"Bikpela as tingting long kirapim dispela helt pos em long helpim ol mama long taim bilong karim, na bai i no inap tingting long go long ol helt senta na haus sik i stap longwe long Emagave hauslain", Mista Soso i tok.

Em i tok nupela helt pos em i stap pinis nau na em i singaut i go long ol pipel long lukautim gut dispela helt pos.



Ekting Sif Eksekutiv Opisa bilong Isten Hailans Provinsal Helt Atoriti, Joshua Soso i katim riben long makim opening bilong komyuniti helt pos long Emagave insait long Daulo distrik. Foto: Loutova Siapea.

Ol PLWHIV bilong Tari, Porgera, Mendi na Dobel i sanap wantaim Helt Ke Wokman na meri, Pastor Kenny bilong Dobel Yunaitet Sios Seket, Rev Oscar Kuni bilong Porgera, Samuel Miril bilong Mendi, Philip Pope bilong Hela, Roman Pembi bilong Asembli opis Helt na HIV Seketeri na Trena Marama Lucy Bogaperi (waitpela klos).



ExxonMobil PNG wokim ol haus tisa



Andrew Barry wantaim het tisa bilong Papa Elementri skul, Puro Bisia i katim riben long nupela haus tisa long las wik.

ExxonMobil PNG, mama kampani bilong PNG LNG Project, i gat bikpela tingting long kamapim gut kwaliti bilong edukesen, olsem na wanpela moa taim gen em i putim mani long kirapim 4-pela haus tisa long 4-pela praimer skul insait long LNG Plent eria.

ExxonMobil PNG i gat bilip olsem edukesen em i namba wan samting we ol ol

pikinini inap kisim long redim ol yet long laip bilong ol long bihain taim. Olsem na dispela kampani i wok long putim moa mani long sait bilong edukesen insait long wokfos bilong en na long ol komyuniti klostu long hap kampani i wok.

Papa Elementri skul na Porebada, Boera, na Lealea Praimer Skul i laki long kisim ol dispela haus tisa.

ExxonMobil PNG

Menesing Dairekta, Andrew Barry i tok, "PNG LNG i amamas tru long sapoim ol komyuniti bilong en long dispela kain gutpela projek.

"Ol tisa em ol impoten pipel long kirapim tingting bilong ol lida man na meri bilong bihain taim. Olsem na yumi mas givim ol gutpela ples bilong stap we bai helpim ol long kamapim ol gutpela sumatin long strongim

ol long kamap ol gutpela lida long bihain taim," em i tok.

Wan wan bilong ol nupela haus tisa i gat 4-pela bedrum o rum bilong slip, wanpela 3000 lita tenk wara na pawa saplai.

ExxonMobil PNG i save helpim ol skul long ol projek eria stat long yia 2010 wantaim ol bikpela projek olsem nupela klasrum na haus tisa, stretim ol narapela fasiliti na long trening bilong ol tisa.

Yunaitet Sios HIV Kea na Sapot Sevis trening

YUNAITET sios i wok long givim yet sapot i go long ol pipel husat i gat binatang bilong HIV na tu ol lain i gat sampela bagarap long bodi bilong ol long soim tru kala bilong Tok bilong God we i no save gat

mak long husat i mas kisim helpim long han bilong sios.

Namel long ol dispela kain pipel, i gat planti meri husat man bilong ol o meri bilong ol i dai pinis o pikinini husat papa na mama i

dai pinis na ol dispela pipel i save painim hat long laip bilong ol.

"Ol Kristen i mas gat pasin bilong laikim ol dispela kain lain," Roman Pembi, Seketeri bilong Helt long Yunaitet Sios Asembli opis i tok.

"Mipela i gat plen long sapotim ol dispela kain lain olsem na mipela i save givim ol besik trening long ol pipel long ol i ken gat save long edvokasi na awenes long ol wankain lain olsem ol yet. Planti bilong ol i save long rit na rait tasol planti i no gat save long rit na rait olsem na i gat bikpela wok yet long mekim wantaim ol bikpela man na meri," Mista Pembi i tok.

Yunaitet Sios Development Yunit (UCP-NGDU), wantaim Sios Patnasip Program HIV/AIDS long las yia, i

bin putim mani long holim wanpela HIV Besik Kaunselig na Trening trening inap long wanpela wik long Dobel Yunaitet Sios insait long Westen Hailans Provins.

Dispela trening em bilong ol Pipel husat i gat binatang bilong HIV (PLWHIV) na ol kodineta olsem ol Helt Ke Wokman na meri (HCW).

Bikpela tingting bilong Yunaitet Sios HIV/AIDS Seketeriet long holim trening em bilong stopim binatang bilong HIV long i no ken kisim ol nupela lain na tu i no ken go moa long ol lain husat i kisim orait pinis long en na long sapotim ol long stap longpela taim. HIV na helt em i wok bilong olgeta pipel long lukluk long daunim na strongim gutpela pasin bilong stap helti long komyuniti.



Pipol em i namba wan risos bilong Papua Niugini

Olgeta dei yumi ritim long niuspepa wanpela meri I lusim laip bilong em taim em I laik karim bebi. Long narapela taim yumi lukim ol kakao fama long Josephstaal long Madang na kopi fama long Marawaka insait long Isten Hailans I brukim bak-sait bilong ol long karim ol kakao na kopi bek I go long haiwe long salim.

Yumi lukim ol fres kaikai fama I hatwok nating na ol kaikai I no go kamap long ol maket long maket. Yumi lukim planti tausen skul pikinini I no gat spes long haikul, kolis o yunivesiti. Yumi lukim ples I pulap long ol yangpela I raun nating I stap.

Yumi lukim long siti planti pikinini I no go long skul. Ol I bisi long ol strit salim ol liklik samting. Ol buai sela long pablik ples I mas ranawe olgeta taim polis I kam long maket bilong ol.

Yumi amamas taim ol spotmanmeri bilong yumi I winim gol o silva o brons. Yumi amamas taim yumi harim ol musik atist bilong yumi I pairap long ol kona bilong dispela graun.

Ol tisa, ol nes, ol polis, na ol ami I gat wari long bel bilong ol tasol ol I givim taim bilong ol long wok bilong gavman. Sampela lida I givim taim long ol tu?

Long haus ol mama na papa bilong yumi I mekim bikpela wok long halivim ol pikinini bilong ol long painim rot bilong ol. Hamamas famili I lukautim ol yangpela olsem ol inap kisim sampela trening long ol trening institut na ol kolis na yunivesiti long Mosbi na Lae na I nogat luksave long ol?

Yes gavman I mekim moa skul nau tasol olsem wanem na planti pikinini I stap yet long haus, strit o ples? I gat planti singaut long mekim helt sevis I kamap gutpela na planti moa pipol inap kisim gutpela lukaut taim ol I sik. I gat ol lida I harim dispela singaut?

Yumi lukluk gut dispela ol lain I ropblut bilong kantri bilong yumi. Tasol I gat gutpela luksave long ol dispela pipol?

Papua Niugini I laikim developmen na em I amamas long bringim ol kampani bilong ol arapela kantri I kam mekim wok. Sampela ol dispela kampani I bringim wokmanmeri bilong em yet na yumi lukim ol liklik wok we ol pipol bilong yumi inap mekim ol arapela lain I mekim. Yumi gat planti greduet bilong ol yunivesiti tasol gavman I amamas long yusim greduet bilong ol arapela kantri na dispela I pusim ol greduet bilong yumi I go long arere.

Ol naispela haus na rot I bilasim ol siti tasol ol fama bilong yumi I tait yet long karim ol kakao, kopi na fres kaikai bilong ol I go long maket.

Yumi gat wok long givim luksave long ol pipol bilong yumi yet. Ol lida I gat wok bilong lukautim gut ol pipol bilong em. Yumi nid long givim rispek long ol na yumi yet tu.

Angore redi long mekim bisnis

OL papagraun na manmeri bilong Angore ges fil insait long Petroleum Developmen Laisens (PDL) 8 long PNG LNG Projek i redi long mekim bisnis na stopim pasin no gut insait long komyuniti.

Blok kampani bilong Angore papagraun, Angore Holdings Limited (AHL), i no bin kisim bisnis developmen gren (BDG) o sid kapital mani long gavman bikos planti paul pilai i bin kamap long Pot Mosbi long dispela taim na ol ausait man tu i bin stilim BDG mani bilong ol papagraun bilong PNG LNG Projek.

Tasol ol papagraun bilong Angore nau i redi long mekim bisnis na bringim sevis i go insait long ples bilong ol.

Las wik Fraide, Angore Special Purpose Authority (ASP) i luksave long edukesen bilong ol skul pikinini long Angore na i baim na givim tupela nupela bas long Idauwi na St John's Tukupawi praimer skul.

Long Ogas 2, ol papagraun bilong tripela welhet long Angore i kamapim wanpela lidasip komiti ol i kolim Angore Wellhead Leadership Committee (AWLC).

Dispela komiti i stap pinis olsem haus man long makim maus bilong ol pipel na tok-tok wantaim projek developa ExxonMobil na gavman long stretim ol samting olsem benefit long redim ol manmeri long senisim pasin na mekim bisnis.

Siaman bilong AWLC, Hari John Akipe, i tok ol papagraun bilong Angore i redi long mekim bisnis na skelim benefit long kirapim ples na senisim laipstail bilong manmeri.

Oltanativ Disput Resolusen (ADR) we Nesenel Kot Jas, Jastis Ambeng Kandakasi, i bin bosim long glasim na painimaut ol tru tru papagraun bilong Angore, i painimaut pinis 49 klen i stap insait long Angore PDL 8 laisens eria.

Mista Akipe, husat i Jeneral Menesa bilong ASPA tu, i tok dispela ADR i bin painimaut olsem foapela klen tasol i papa bilong graun we tripela welhet – Welhet A, 1A na B - i stap long en.

Ol dispela klen em ol Halapura, Imiki, Pereke na Huru-pali klen. Dispela tripela welhet i stap long graun bilong ol long Undupi viles insait long Hayapuga LLG, Tari-Pori distrik.

Mista Akipe i tok tupela



Mista Akipe i soim Fes Asisten Seketeri bilong Nesenel Plening, Koney Samuel, long plen bilong nupela het opis bilong ASPA



Ol kar insait long kemp bilong AHL

blok kampani bilong Angore, TT Noa Hai Limited and Angore Holdings Limited, i stamim pinis bisnis long ples na ol manmeri i sapatim dispela tupela kampani long mekim moa bisnis.

"Mipela i lukim asua bilong gavman na papagraun pinis. Mipela i lainim lessen long dispela na mipela nau i redi long mekim bisnis," Mista Akipe i tok.

Wantok Niuspepa i bin go raun long Angore na lukim bikpela kemp bilong AHL.

AHL i kirapim nupela haus kapa, banisim ples, na baim ol kar long statim bisnis. Het opis bilong AHL i stap long Tupake long Undupi viles.

Ol i banisim gut kem bilong kampani na kirapim tripela bikpela na pemenen haus. Wanpela haus em i haus bilong slip o los.

Ol wokman bilong kampani i save slip long dispela haus. Insait long banis, moa long 7-pela kar i stap insait.

Narapela haus em i opis bilong AHL na em i gat olgeta samting we ol wok man i save yusim long mekim wok.

Namba tri haus em i nupela het opis bilong ASPA.

Em i stap insait long banis na kem bilong AHL.

Ol kapenta i wok long mekim yet dispela het opis bilong ASPA. Klostu taim ol bai pinisim konstraksen wok na opisal opening bai kamap.

NEC Disisen Namba 359/2014 i kamapim ASPA long yia 2015 na givim K3 milien aninit long 2016 nesenel baset long larim ASPA i mekim ol wok.

Dispela mani i mekim wok. ASPA i rentim kemp bilong AHL na i wok long stap long hap long givim ol projek.

"AHL em i praivet bisnis bilong mipela. Em i blok kampani. ADR i pinisim wok painimaut na mipela bai kamapim ambrela kampani klostu taim," Mista Akipe i tok.

Mipela i redi long yusim dispela sans we PNG LNG Projek i givim long mekim bisnis na kirapim komyuniti," Mista Akipe i tok.

Mista Akipe i tok tenkyu long ol manmeri long Undupi i stopim pasin nogut na senisim pasin.

"Long hia mipela i redi long mekim bisnis. Ambrela

kampani bilong ol papagraun bilong Angore i no kamap yet.

"Mipela i no kamapim wanpela ambrela kampani yet. Blok kampani bilong mipela, Angore Holdings Limited and TT Noa Hai, i statim gut bisnis na mipela i amamas long lukim dispela."

"Ol polisman i slip long haus bilong TT Noa Hai na dispela i soim gutpela sain olsem bisnis long Angore ba kamap gut.

"Mipela i statim liklik na liklik bisnis i wok long gro. Wanpela namba wan samting mipela i mekim em long holim bek olgeta lidasip.

"Mipela ol papa bilong tripela welhet bai holim olgeta lidasip na benefit em mipela bai skelim. Lidasip bilong AWLC i stap pinis long mipela yet.

"Lidasip bilong ASPA, mipela yet i kisim pinis. Lidasip bilong 4.27 pesen Krotton Ekwiti kampani, lidasip bilong Gas Resources Angore long MRDC, em olgeta mipela yet bai kisim.

"Bai mipela i skelim benefit long ol pipel long Angore" Mista Akipe i tok.



Kopret Sevis Dairekta bilong Isten Hailans Provinsal Helt Atoriti , Michael Singip (rait) i givim sek i go long tim kodineta bilong Walk The Talk Against Cancer, Barbara Toiyoi. Ol fan long dispela sek bai helpim ol meri long baim balus na i go long bik siti Pot Mosbi long wokim ol fan reising ektiviti bilong ol.

Ol EHP meri bai resim fan bilong sik kensa

Loutova Siapea i raitim

Isten Hailans Provinsal Helt Atoriti i no sindaun bek na luk luk tasol long sampela ol meri long Goroka husat i gat bikpela laik tru long wok olsem ol volantia long resim mani long baim ol masin bilong tritim o oraitim ol sik kensa long ol mama.

Grup lida bilong Walk The Talk Against Cancer, Barbara

Toiyoi i tok ol meri lida na mama long provins i luksave long dispela hevi bilong kensa we i wok long daunim planti mama long provinsal na olsem, ol i kamap wantaim tingting long kamapim ol fan reising long helpim baim ol masin na marasin bilong sik kensa long ol mama.

Em i tok sapos gavman i no nap luk luk long helpim ol mama wantaim ol sik kensa, lo

i putim han i go antap long karim dispela hevi bilong ol mama na kamap wantaim sampela gutpela samting long helpim ol tu.

“Sapos yumi i no nap givim han, sindaun na luk luk tasol i stap, ol mama bai lusim laip bilong ol yet long sik kensa. Olsem na long nau yet mipela i luk luk long painim sampela rot long kamap wantaim sampela gutpela tingting long helpim na pait agensim dispela ol sik

kensa”, Toiyoi i tok.

Grup i bin raun na painim ol spona long i go daun long Pot Mosbi long karimaut dispela ol wok bilong resim mani.

Olsem na Isten Hailans Provinsal Helt Atoriti i luksave gutpela wok ol bai mekim olsem na em i givim moa long K3,000 i go long helpim na sapotim ol long baim tiket bilong balus we ol i ken i go long Pot Mosbi na karimaut wok bilong ol.

2016 so bilong ol meri bai kamap long Mosbi

STAT long neks wik Fonde Septemba 15 inap long de namba 25, ol meri bai holim 2016 Ekspo o so bilong ol long Mosbi.

10-pela de so bai kamap long Steimsips hatwe kompaun long Waigani, Nesenel Kapitel Distrik.

Eksekyutiv Dairekta bilong PNG Wimen in Bisnis (WIB), Janet Sape i tok nupela opios bilong ol i stap nau long dispela kompaun.

Em i tok tu olsem ol i kisim spes long kompaun bai kamap olsem pemenen bisnis senta bilong ol meri .

Misis Sape i tok em i strongim ol meri long go kisim spes bilong ol long hap.

Pe bilong rijista na kisim spes em K1,000.

Em i tok ol meri i ken kukim ol kain kain kaikai long ol wan wan provins bilong ol bikos ol i laik promotim ol kaikai we ol i kukim long ol kain kain rot.

Sios helt sevis wet yet long kisim pe

Paul Zuvani i raitim

OPIS bilong KRISTEN Helt Sevis (CHS) i tok planti bilong ol haussik bilong em i stap long mak bilong pas na sampela i daunim namba bilong ol wokmanmeri bilong en.

Wanpela opisa bilong CHS i tok ol dairekta bai kamap long het opis long dispela mun na givim ripot bilong ol long wok painim ol I mekim long stap bilong ol haussik bilong ol.

Em I tok bihain long bung ol dairekta bai mekim disisen sapos ol i mas pasim ol haussik bilong ol o nogat.

Opisa i mekim dispela tok taim ripot i kamap long dispela wik olsem Gavman i makim gen K20 milien bilong K50 milien we Gavman i bin rausim long stat bilong dispela yia.

Helt Minista Michael Malabag i tok Gavman i givim bek K20 milien long 2016 Saplimentari

mani plen long baim ol sios haussik wokman na meri.

Tasol Wantok i bilip dispela bai i no inap stretim hevi we ol CHS haussik i wok long bungim long dispela taim.

Disisen bilong ol CHS i laik pasim ol haussik em bikos ol wokman na meri i no kisim pe long las faivpela fotnait, CHS sif eksekutiv opisa Joseph Sika i tok.

Em i tok K50 milien mani Gavman i rausim long Sios Helt Sevis (CHS) 2016 baset em bikpela hap bilong en i kam long pe bilong ol manmeri.

Sika i tok wantaim hevi bilong K50 milien mani, Gavman i save kisim longpela taim long givim mani bilong CHS long taim em i mas givim.

Dispela ol hevi i mekim CHS i bungim taim nogut na i painim rot long em i ken lukautim ol wokman na meri

na givim sevis long ol manmeri.

Gavman i save givim mani bilong wan wan mun long CHS.

Em i tok hevi bilong pe i no go hariap i givim bikpela hevi long ol wok manmeri na edministesen bilong CHS.

Sika i tok sapos Gavman i tingting long rausim mani, em i no ken rausim mani we ol i yusim long baim ol wokman na meri bilong em.

Wantok Nius i save olsem dispela K20 milien long 2016 Saplimentari baset i no inap long stretim hevi we CHS i wok long bungim long dispela taim.

Dispela long wanem Saplimentari baset bai kamap long tupela mun bihain na CHS helt sevis i no kisim yet K16 milien pe bilong mun Julai na Ogas yet.

Na taim K20 milien bai kamap long Novemba, bungim wan-

taim nid bilong Julai na Ogas, i gat nid bilong mani long dispela mun na Oktoba we Gavman i mas givim pastaim bipo long ol em tok long mani long Saplimentari baset.

“Inap long faivpela fotnait nau ol wokmanmeri bilong mipela i no kisim yet pe bilong ol,” Sika i tok.

“Sapos Gavman i givim mani mipela i mas wetim Fainens dipatmen long ol i tok orait bipo long mani kamap tru long mipela. “Taim mani i kam long akaun, mipela i mas wet inap long foapela de bipo long wan wan manmeri i kisim mani.”

Em i tok opis bilong em bai mekim disisen long sapos ol i mas pasim ol ejensi bilong ol taim ol dairekta bilong ol i kamap wantaim ripot bilong ol long dispela mun.

SAVE na MEKIM

Sapta 2
...moa yet long hap 1 (Kaukau)

Wokim plaua long kaukau

Mekim kaukau i drai pinis, orait, brukim long liklik garamut o long masin ol i kolim grainda. Em nau, plaua kaukau. Tok bilong mekim wanem long dispela plaua kaukau

1. Sapos yu was gut na em i stap drai, bai em i no inap bagarap kwik.
2. Yu ken kukim nating olsem skrap taro. Tanim wantaim pinat o soyabin na kukim, em i gutpela.
3. Tanim wantaim wara o susu samting na kukim long praipan.
4. Tanim wantaim plaua bilong wit na kukim bret, o basket.


Kek Kaukau

Kisim ol samting olsem:
2-pela kap plaua kaukau,
2-pela spun majarin,
1-pela kap suga,
1-pela kiau kakaruk,
2-pela o 3-pela susu
2-pela tispun bekpaura liklik sol.

Tanim suga wantaim majarin inap tupela i miks gut. Brukim kiau i go insait long dispela na tainim gut wantaim suga na majarin.

Long narapela plet, tainim plaua kaukau na bekpaura na sol. Kisim liklik long dispela na tanim wantaim suga na gris na kiau. Putim liklik susu na tanim. Putim liklik plaua, tainim. Wokim olsem inap plaua i pinis.

Pulimapim long plet bilong kukim bret na kukim insait long stov.



Odinesen bilong Misineri Yoso Kui

Nick Malaka i raitim

WANPELA bilong planti misineri bilong ELCPNG Luteran sios em Yoso Kui husat bin sevim 10-pela yia insait long Midol Is kantri olsem misinari aninit long Opere-sen Mobilaisasen long yia 1994 i go long 2002.

Long mun Ogas long dispela yia, em i kisim odinesen bilong kamap wanpela pasto insait long ELC-PNG Luteran sios.

Bihain long tripela yia, taim em i graduet long Martin Luta Seminari long 2013 wantaim Diploma ov Tioloji, em i kisim odinesen long Saint Jon Luteran kongrigesen long Munum asples bilong em yet insait long Wampar seket-Yabem distrik long Morobe Provins.

Long dispela odinesen 4-pela pasto bilong Wampar seket wantaim seket Presiden, Pasto Gawas Mois i kam long witnesim na putim han antap long nupela wokman Yoso Kui.

Het-bisop bilong Luteran Sios. Reveren Jack Urame wantaim Jenerel Sios Seketeri, Benard Kai-



Pasto Yoso Kui i sanap namel wantaim Hetbisop Jack Urame long fran na Distrik Presiden, Elisha Didi long han sut bilong em. Pikinini meri Leah i sanap baksait.

som, Keteka Presiden bilong Yabem Distrik Reveren Elisa Didi, Reveren Luke Timothy bilong misin des opis bilong sios na Yabem Distrik Yuth Kodinata i bin kam long Ampo Hetopis long mekim wok bilong odinesen.

Pastaim long wok bilong odinesen i kamap, Keteka Presiden na Gutnius Dairekta bilong Yabem

Distrik, Reveren Elisa Didi i welkamim ELCPNG Luteran sios Hetbisop Reveren Jack Urame, na em i ridim resolusen bilong Yabem Distrik konpren we i kamap long Menyamya las yia 2015, i tok orait long dispela wok bilong givim wok long nupela wokman i mas kamap. Na em i givim nupela wokman i go long Het-bisop bilong sios i ken



ELCPNG Misineri Yoso Kui i demonstretim ol narapela kain stail laplap ol lain i save werim long Midol Is long 2012.

givim odinesen blesing long em. Taim Het-bisop Reveren Jack Urame i givim blesing long nupela wokman, olgeta pasto i sanap raunim nupela wokman na putim han antap long em.

Reveren Jack Urame i tok, "Yoso em i wanpela bilong ol dispela lain i bin tok yesa na putim han i go antap long bekim askim bilong God i stap long Aisaia.6:8; God i tok bai yumi salim husat? Na Yoso i tok salim mi". Olsem na Keteka Presiden na Gutnius Dairekta bilong Yabem Distrik Reveren Elisa Didi i tok, "Yoso nau i kisim nupela nem pasto olsem wanpela hevi em i karim, na femli tu bai sanap bek-sait long em na karim dispela hevi olsem i kamap nau. Tasol hevi bilong dispela wok i ken kamap amamas bilong yupela. Bekos namba wan pe tru em Krai i bin redim pinis bilong yupela bai kisim bihain. Em laip i pulap long amamas tru".

Reveren Luke Timothy em i wokman i bosim misin des opis bilong Luteran sios i tok, sios bai salim misinari i go savim wok ministri ovasis.

Tasol as paris na kongregasen i mas sanap beksait long misinari na sapotim em olsem ol arapela bin mekim pinis. Dispela bai lukim wok misin ovasis bai kamap orait."

Dispela tok bilong Reveren Luke Timothy i kamap bihain wok misinari Yoso Kui i bin mekim pastaim long givim tingting long Wampar seket na as kongrigesen Saint Jon Luteran.

Pasto Yoso em i wanpela strongpela misineri husat i no save wok namel long Luteran sios tasol. Em i save wok wantaim ol arapela lotu.

Bikos em i gat planti laip testimoni olsem misineri husat i wok wantaim planti liklik lotu.

Olsem na planti ol arapela liklik lotu i save singautim em na kisim save long planti wok God i bin usim em long mekim namel long ol arapela kalaskin manmeri long ol arapela kantri em i bin mekim wok misin long en.

Dispela i soim long wok bilong em wantaim ol dispela liklik lotu.

Long nu-yia 2010, wanpela bikpela hevi i bungim em taim em i mekim wok bilong selebretim nu-yia long Sangan seket insait long Yabem distrik long Morobe Provins.

Em i bin kisim wanpela kol olsem meri bilong em i lusim laip long asples bilong Yoso. Bikpela wari i bungim em, long wanem meri bilong em i no bilong Papua Niugini.

Tasol em i bilong hap Midol Is we Yoso i bin go wok misin long en. Dispela i mekim em i sori tumas.

Narapela samting tu i olsem, em i no stap klostu long meri taim meri i lusim laip. Na tu dispela em i namba tu yia bilong em i stap olsem sumatin yet insait long Martin Luta Seminari, na meri i lusim em wantaim tupela pikinini meri, Leah na Rodah.

Dispela olgeta i no mekim Yoso i pundaun long bilip na lus tingting long God. Nogat.

Olgeta dispela hevi i kamap olsem steping ston em i krungutim na pusim em i go antap long nupela mak bilong wokabaut bilong ol bilip manmeri.

Odinesen bilong em i soim ples klika kaikai bilong bilip we i mekim em i wokim bikpela komotmen tru long God.

Tasol dispela odinesen i kamap olsem sori samting taim meri na mama Victoria i no stap wantaim bodi tasol long spirit.

Plantu manmeri i kra i wantaim amamas taim ol i singim Wampar-medazon olsem song bilong tingim Bikpela Jisas i redim em yet long bungim hevi, taim ol i tingim leit Victoria na hevi Yoso i wok long karim olsem widowa.

Laspela samting we Yoso ino napus lus tingting long en em ol promis. Taim Victoria i stap laip yet, tupela i bin promis olsem tupela bai ek-senisim taim ol i dai.

Sapos Victoria i dai na planim long Papua Niugini wantaim nesenel flak bilong Midol Is, orait wankain pasin mas kamap long Yoso long kantri bilong meri long bekim na strongim promis na wanbel bilong tupela.

Bena Luteran Sios i wokim wanbel pasin

Paulus Tali i raitim

OL Bena Luteran Kristen long Wod 6 long Unggai Bena Distrik i kam aut na tok sori kra i wantaim bikpela sori.

Ol i putim o blekpela klos long soim mak bilong sori, na kra i longpela taim bihan long 35 krismas ol i stap aut long sios.

Na inap nau ol kam bek long soim tru kala

long mak bilong wari na sori long rong pasin ol mekim na kam bek long sios long Bena seke na statesmen Rekonsail bin kamap.

Dispela taim, moa long 550 ol kristen man meri kam long Ward 6, insait long Bena eria i kam wantaim bihanim ol tumbuna, na papa bilong ol i stap insait long sios, tasol ol i no save mekim wok bilong sios tumas.

Ol i lusim sios na stap longwe inap 35 krismas inap nau ol pipel i kam bek long ol Kristen bai mekim moa senis long luk luk na sidaun bilong ol.

Ekting distrik Preseden bilong ELC Goroka, Pasto John Mombaino, husait bin kamap long witnesim programi amamas long wokabaut bilong Rekonsail i bin kamap.

Dispela bai na bai mekim moa senis long nupela wokabaut bilong komyuniti na sios long Bena,

Pasto Mombaino i tok tu olsem bipo, planti lain i save kolim ol Bena pipel olsem ol lain bilong pait na olsem, eria bilong ol i kamap olsem Paiting zon inap long nau.

Em i amamas olsem ol pipel i go bek na senis.



Ol lida lain i sanap pastaim long sios rikonsiliesen lotu. Foto: Paulus Tali

WANTOK
KOMENTRI

Yumi no klia gut long mining bilong gutpela sportsmensip

I LUK olsem yumi ol PNG i stap yet long tudak. Yumi no klia long pasin bilong pilai spot na amamas long taim wanpela tim i win na i no ken belhat nating na kirapim pait sapos tim i lus.

Tupela wik i go pinis long Pot Mosbi, ol pipel bilong PNG i sem tru long lukim bikpela pait i kamap long semi final bilong bikpela ragbi lig resis. Tim i lus i bin statim pait na ol sapota i kam insait na paitim ol pilaia na opisal. Long outsait long bikrot tu ol sapota i tromoi brik na brukim het bilong wanpela man i sindaun long kar. Dispela yangpela man i dai bihain long haus sik long ol bagarap em i bin kisim long het bilong em.

Dispela kain pasin bilong kirapim pait na distebim ol arapela lain em i kriminal pasin na i no bilong ol spot man na meri tru. Namba wan as bilong pilai spot em long amamas na soim skil na save bilong yu. Sapos tim i lus, orait tok amamas long wina na wetim neks raun gen na yu ken salensim ol.

Ol kain bikpela spot olsem ragbi i save kisim bikpela sponsasip tru na gavman i spendim bikpela mani tru long stretim ples bilong pilai na trening na ol arapela sapot long edministresen bilong dispela spot. Tasol i luk olsem ol dispela bikpela hatwok na mani gavman i spendim i go lus nating sapos yumi no inap long stopim pasin bilong pait long taim tim i lus.

Wanpela bikpela program bi-



long gavman long las faivpela yia, em long mekim spot i kamap wanpela impoten samting long kantri we ol man meri na pikinini i ken go lukim na amamas. Gavman i lusim mani inap long mak bilong bilien kina i long sanapim ol gutpela ples bilong pilai, givim trening long ol spot manmeri, ol teknikel opisa ol spot admin-

istreta na planti arapela samting. Em i gutpela na ol pipel i amamas na sapotim tingting bilong gavman.

Dispela bikpela invesmen bilong nesenel gavman i karim kaikai long taim PNG i bin winim planti medol tru long Pasifik Gems. Ol spotman na meri i bin pilai gut na ol i pilai wantaim ama-

mas bikos long bikpela sapot bilong gavman.

Gavman i bin makim gutpela ministra tu long lukautim spot na em i soim kala bilong em long olgeta spot na ol spot manmeri bilong kantri. Bikos long bikpela wok bilong gavman, ol bikpela spot i pulim ol ovasis lain i kam pilai long PNG na strongim ol pi-

laia bilong yumi tu. Olsem na yumi mas luksave olsem spotsvailens i no ken bagarapim gutpela nem bilong yumi.

Disisen bilong ol lain i lukautim dispela ragbi salens long rausim dispela tim long pilai long PNGRFL inap 3-pla yia em i gutpela. Sampela lain i tok dispela panismen em i no strong tumas. Planti i laik ol i mas pinis olgeta na i no ken pilai ragbi moa.

Tasol dispela kain panismen bai bagarapim sans bilong ol arapela yangpela spotman husat i laik pilai ragbi long nesenel level.

Olsem na i gutpela tu long PNGRFL i mas gat program bilong ol biknem pilaia i mekim awenes long ol sapota i mas stap isi na i no ken kirapim pait long taim tim bilong ol i lus.

I mas gat program tu bilong ol ragbi opisa long daunim pasin bilong belhat na kontrolim ol yet long ples bilong pilai.

I mas gat gutpela sapot bilong developmen program bilong ol spot long kantri. Em i bikpela samting.

Sapos dispela program I strong bai ol yangpela pilaia i luksave na strongim stretpela pasin bilong pilai na amamas long taim bilong win na stap belisi tu long taim ol i lus.

Yumi mas senisim tingting na pasin bilong sapotim ol spot tim nau. PNG i tok NOGAT pinis long kain kain vailens, orait mobeta yumi strongim dispela tu na tok NOGAT long vailens i save kamap long taim bilong pilai spot.

Givm bek pawa long Woks na Implementesen Dipatmen

GAVMAN i mas givim bek pawa long Woks Dipatmen long mekim ol pablik wok

long wanem dispela Dipatmen i save mekim na stretim gut ol rot, bris, ples balus, haus na ol narapela pablik wok long mak ol i mas kamap long en na long mani mak bilong ol stret.

Ol pablik rot, bris na haus long ol taun na rurel ples wantaim bipo long taim bilong Indipendens na i kam long 1970s na 80s i bin gutpela tasol nau planti i pinis olgeta o klostu i bagarap.

Long bringim bek dispela ol sevis, Gavman na moa long dispela wan wan ol Memba bilong Palamen, i mas kirapim wok long distrik bilong ol wantaim distrik sevis impruvmen program (DSIP) mani.

Ol sevis olsem ol kiap (Distrik CEO) i mas patrol long ol ples long save long sindaun bilong ol manmeri, ol skul in-



spekta i mas go sekim ol skul na tisa. Ol sista na nes i mas go long ol ples na mekim ol klinik raun, ol didiman opisa i mas go raun sekim ol wok didiman long ol ples na ol Fainens opisa i mas raun long tokim ol manmeri long wok bisnis na sevim mani.

Nau yet planti bilong dispela ol sevis i bruk daun na sindaun bilong ol manmeri i bagarap bikos ol opisa i no mekim wok bilong ol.

Long Woks Dipatmen em i gutpela long harim Woks Minista Francis Awesa i tok long givim bek pawa long Di-

patmen long em i mekim ol pablik wok.

Em i mas pasim dispela agrimen em i mekim wantaim ol kampani long mekim ol rot, bris na haus i go bek long Dipatmen.

Long ol Mani Plen Gavman i givim long Woks na Implementesen Dipatmen K1.443 bilien em i givim long 2015, K1.06b long 2016 na i ting long givim K400 milien long 2017 baset.

Dispela em ol mani mak tasol sapos Gavman i mas givim moa long dispela mak, em i mas givim long lukim Dipatmen i mekim gut wok bilong em.

Planti ol stori Gavman yet na manmeri wantaim i lukim ol kampani i no save mekim gut wok o sapos ol i mekim, ol i mekim hap hap wok tasol.

Ol wok olsem 5-Mail Rot long Pot Mosbi we kontrakta i mekim na rot i bruk liklik

taim gen maski kampani i kism bikpela mani long mekim dispela rot, ol polis haus long Bumbu long Lae, Morobe we kontrakta i no pinisim ol haus. Ol rot long Madang taun long planti taim Gavman i givim mani long kontrakta i stretim ol rot tasol ol i rot i bagarap na stap wankain yet na planti ol wankain stori long ol narapela hap bilong kantri.

Gavman yet i save bipo long 1995 long ol kampani i kisim wok long mekim pablik wok, Woks Dipatmen i mekim gut ol wok na planti bilong dispela ol wok i stap longpela taim.

Moa long dispela, Dipatmen i save mekim long wok long mani mak i stret.

Sapos Gavman i mekim olsem em i tok long em, Skelim Tingting i bilip gutpela sevis bai go long ol manmeri gen na em bai sevim planti mani.

WANTOK

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

SAINA GIVIM SKOLASIP LONG 23 STUDEN

Nicky Bernard i raitim

OL papama bilong 23 sumatin husat bai go stadi long Saina i amamas tru long gavman bilong Saina i givim sokalasip long ol pikinini bilong ol.

Gavman bilong Saina i statim dispela skolasip program long 2003, tasol ol i no save kisim planti sumatin tumas.

Bihain long 2003 Gavman bilong Saina i stat long kisim planti ol sumatin bilong Papua Niugini long go skul long dispela skolasip program. Long 2003 i kam inap long dispela yia, moa long 300 sumatin bilong PNG i bin winim dispela skolasip na go skul long Saina.

Long las wiken ol dispela 23 sumatin bilong PNG i bin lusim kantri.

Long taim bilong kisim pepa na tiket long Embasi bilong Saina, i bin gat liklik kaikai bilong tok gutbai na planti papamama i amamas long gavman bilong Saina i kamapim dispela skolasip program long strongim pren namel long Saina na PNG.

Embaseda bilong Saina long PNG Li Ruiyou i tok, PNG na Saina i kamap gutpela poroman bihain long Praim Minista Peter O'Neill i bin raun i go long Saina na dispela wokbung namel long tupela kantri i mas stap strong yet.

Em i tok tu olsem Saina i gat 'open door' polisi na kain skolasip Saina i givim long ol sumatin bilong PNG bai strongim dispela wokbung bilong tupela kantri.

Em tokim ol dispela 23 sumatin olsem, em i no isi long lainim ol samting tasol ol mas skul gut na lainim wanem samting ol i go long lainim. Em tokim ol



Aaron Leva, i amamas long kisim pepa bilong em long han bilong Ambassador Li. Aaron bai stadi long Mekenik Enjinia long Saina.



Zephaniah Kundi i amamas long kisim ticket na pepa bilong tok orait long stadi long han bilong Ambassador.



Renee Suanimbi Marru i kisim pepa na tiket bilong em long han bilong Ambassador Li taim ol mekim gutbai pati long Chinese Embassy long Mosbi.



Zephaniah Kundi, i sanap wantaim Ambassador Li wantaim papa na mama bilong Zephaniah bihain long em i kisim pepa na tiket bilong em long go stadi long Saina.



Ol sumatin wantaim ol opisa bilong Opisa bilong Higher Edukesen na Chinese Embassy i sanap wantaim Chinese Ambassador Li Raiyou long fran bilong Chinese Embassy long Pot Mosbi.

Ol foto Nicky Bernard.

tu olsem ol mas lainim kalsa na tokples bilong Saina na ol tu mas soim kalsa na pasin bilong PNG long taim ol i go skul long hap.

Embaseda Li, i tok planti ol Papua Niugini sumatin husat i wok long stadi long Saina i stap longpela taim long Saina long stadi na dispela i soim olsem ol

sumatin i gat planti samting long lainim.

Zephaniah Kundi i makim maus bilong ol sumatin na tok tenkyu long Gavman bilong Saina long givim ol dispela skolasip long go stadi.

Em i tok ol bai go na stadi gut na karim nem bilong Papua Niugini.

"Mi makim maus bilong

ol dispela 23 sumatin na tok tenkyu long Gavman bilong Saina long givim mipela dispela skolasip long go stadi long Saina. Mipela tu i no lus tingting long papamama bilong mipela long givim mipela taim long go stadi long wanpela longwe kantri olsem Saina." Kundi i tok Minista bilong Haia

Edukesen, Risets, Saiens na Teknologi Francis Marus i tok tenkyu tu long Saina long opim dua bilong ol sumatin bilong PNG i go skul long Saina.

Em tok nau i gat planti ol gret 12 na sekenderi skul long PNG long wanem long fri edukesen na tuisen fi fri polisi bilong gavman na moa pikinini i go long skul.

Mista Marus i tok tu olsem i gat ol 34 rejista haia edukesen institut insait long kantri bihain long 6-pela yunivesiti, tasol dispela i no inap long ol gret 12 sumatin taim ol pinisim skul bilong ol.

Em i tok populesen bilong ol gret 12 i wok long gro bikpela i stat long 2007 i kam inap long 2015 na klostu bai bungim mak bilong 3.2 pesen.

Minista Marus i tok tenkyu long ol opisa bilong Haia Edukesen wantaim Embesi bilong Saina long bikpela wok ol mekim long stretim dispela skolasip program.

Nem bilong ol sumatin husat i kisim skolasip em:

Masters Program: Dien-gao D Muhuyupe na Kalen Karapen.

Under Graduate: Zephaniak Kundi, Kila Ida Gerega, Josiah Karlyo, Peter Joshua, Aaron Leva, Nicholyn Taimen, Wane Kennedy, Benjimman Mendel, Lisa Areka, Fox Waukave, Samuel Wandama, Mark Mondia Nancy Kamara, Jessica Hiwi, Pauline Pandea, Opara Tobey, Renee Suanimbi Marru, Melanie Pakea, Paniel Pake, Lisa Areka na Michael B. Manghap

Dispela ol sumatin bai kisim kain kain kos taim ol i go kamap long Saina. Ol bai skul inap 5-pela yia long pinisim ol dispela kos.

Saina tok ol ripot bilong Saina i no givim gutpela welkam long Obama i no tru



Obama i no bin wokabaut long retpela kapet i go daun long balus bilong em long taim em i kamap long bung bilong ol lida bilong G20. Ol arapela wol lida i bin kisim bikpela welkam na wokabaut long retpela kapet.

OL nius ripot bilong ol westen kantri i wok long mekim bikpela stori nating long pasin Saina i bin mekim long tok welkam long Presiden Barack Obama long taim em i kamap long G20 miting long Saina. Dispela em i bin wanpela liklik samting tasol ol nius lain i bin mekim bikpela stori tru long en.

Kain kain ripot i bin kamap long taim Presiden Obama i bin kamap long Hangzhou ples balus long bung wantaim lida bilong Saina Xi Jinping long Sarere apinun. Ol pipel long ples balus i bin paul nabaut. Ol opisa bilong

Saina na Amerika i kros na bikmaus nabaut. Wanpela opisa bilong Saina i bikmaus, "Dispela em kantri bilong mipela! Em ples balus bilong mipela!"

Kain kain toktok i bin kamap. Sampela i tok ol Saina i no bin putim retpela kapet long Obama tasol ol i bin putim long ol arapela wol lida bilong G20. Tasol bihain ol Sainai tok em i liklik samting nating.

Presiden Obama i bin tok pilai long dispela samting na i tok ating ol Saina i bin kirap nogut long lukim bikpela delegesen bilong USA na ol i

paul nabaut long ples balus.

Long Mande Global Times, wanpela niuspepa bilong Komunis pati i tok dispela samting i bin kamap long ples em liklik samting tasol ol ovasis nius lain i raitim stori na mekim i kamap olsem wanpela bikpela kros namel long Saina na USA.

Dispela niuspepa bilong gavman i tok dispela samting i no bagarapim wok bung namel long USA na Saina. Em i tok, "Obama bai i no laik lukim kros i kamap namel long USA na Saina bipo long em i lusim opis."

Syria toktok long belisi long miting bilong G20

OL lain bilong USA na Rasia i no inap long stretim ol tok long painim rot bilong stopim ol lain bilong Islamik Stet na pinisim woa long Syria.

US Dipatmen bilong Stet i bin ting bai US Presiden Barack Obama, na Presiden Vladimir Putin bilong Rasia bai stretim olgeta toktok long taim bilong miting bilong G20 long Saina. Tasol bihain long ol soldia long gavman bilong Syria i kirapim pait gen long Aleppo, tupela kantri i bin stopim pres konpres em US Seketeri bilong Stet John Kerry na Foren Minista bilong Rasia, Sergei Lavrov, i bin redi long givim long ol nius lain. Sapos i bin gat agriman, bai olgeta hatwok namel long tupela kantri i karim kaikai.

Dispela agrimen i toktok long Syria i mas slo daun long bomim ol rebel paitman na tok orait long Rasia na Syria eafos i bomim Jabhat Fateh al-Saham, bipo ol i kolim al-Nusra Fran husat i wok wantaim al-Qaida. Al-Nusra i senisim nem i go long Jahat Fatteh al-Aham (Conquest of Syria) long mun Julai.

Planti ol rebel long Syria em USA i sapotim ol i bin wok wantaim al-Nusra na ol i no laik lusim ol. Ol i tok ol i wok wantaim long autim namba wan birua bilong ol, Presiden Bashar al-Assad.

Dispela kain wok bung bai i no isi long lukim ol lain USA i wok wantaim long al-Sham na bai lain bilong USA na Rasia i serim infomesen. Ol save lain i wok long

glasim ol mep bilong eria long lukim we ol lain oposisen i stap na we ol lain bilong Assad bai i tambu log dropim ol bom. Narapela dil tu bai i ken opim rot bilong bringim ol kaikai na marasin i go insait long Syria na stopim ol pait long Aleppo we 250,000 sivilien i sot tru long kaikai.

Long Sande moning, Presiden Obama i tok ol tupela kantri i "no wanbel long planti samting." Long wanem rot ol i mas bihainim long stopim dispela woa long Syria we i winim 5-pela yia nau.

"Yumi no inap tok olsem rot i op nau. Tasol i gat sans long toktok yet," em i tok.

UN spesel mausman bilong Syria i tok ol i bin toktok bai karim kaikai na bai ol i ken redi long bungim ol oposisen tim bilong Syria neks wik long London na bihain bai ol i ken toktok long taim bilong miting bilong UN long pinis bilong dispela mun Septemba. Em i tok ol toktok i dai long rot bikos USA na Rasia i no wanbel long wok bung.

Ol soldia bilong Turkey i go insait long noten Syria long rausim ol lain Kurdish em USA i sapotim i bin kamapim moa hevi.

Presiden Obama i tokim G20 miting olsem i no isi long painim rot bilong stopim dispela woa. Em i tok ol i no wanbel long sampela askim bilong Rasia tasol ol i bilip long wok bung na stopim dispela woa long Syria.



People connecting People



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

Toro

Toro stap long Daru na singaut long redio i go long Malalaua Distrik opis long toktok wantaim poro bilong em John...

Taru korin Mararaua,,Taru korin Mararaua...ova...

Jori poi kamin...Jori poi kamin...ova...

John i kisim redio long Malalaua Distrik opis na bekim...

Yes Toksy mero kamin..This is Johnny Boi hia...Kamin Toksy...ova...

Haaa mai farata!..it kut tu hia yo vois farata Jori.. Ai sen yu wan pekis yu pik it ap o no?...ova..

Yes mi kisim baramandi bokis pinis.. tenkiu bro! ..ova..

Haa mai farata!..nais wan! Don foket, neks taim yu sen mai pekis ah?. Wan mori seika kels flom Mararaua..yu nou,.. laik the song...

sapos yu laik salens mi,ai dont kea enipoti.. hahaha!.. ova..

Biabia

Klostu ileksen na Memba Biabia joinim Poi Nangu tim long Media Pul Kompetisen long soim olsem em i bilip long strong wok bilong ol media grup...

Memba Biabia, tenkiu long joinim mipela..mi bai mekim toksave long ol arapela tim pleias...

Ledis & Jentolmen!! Yumi welkamim memba Biabia long joinim Media Pul Kompetisen bilong 2016!! Nau yu ken lukim memba em wanpela dai hat fen bilong media na bilip strong long yumi! Welkam!!

Yesya!! Givim han i go long gutpela memba bilong yumi!! Mi harim olsem memba bai putim ten gren long ba na bai yumi dring long laik...hehehe!

Er.. sori mi lusim sek buk long haus.

Kanage

Kanage kisim bas 9 na go long Gerehu..Drava putim musik na em hai pilins stret...

Apim volium draiva!!

Ino long taim na traipela ren i kapsait kamdaun...Meri long fran i no pasim windua na ren i go insait na wasim pes bilong Kanage i stap..

Kanage em kisim taim stret..

Hoi fetibuli!! Inap yu pasim windua bilong yu?! Ren i wasim pes bilong mi yah!! @#%\$!!

Wanem?! Ren wasim yu na bai yu kisim grille ah?!!

Pasim maus!! Mi kam bai yu lus weit long hap!

Autim Tingting

Dia Edita,
MI laik toktok long distrik baundri long Nipa Kutubu distrik.
Wari na tingting bilong Nipa pipel i olsem em i bikpela ilektoret tumas na hat tru long givim gavman sevis tu long ol pipel. Olsem na 2017 ileksen i no kam yet, traime seperetim Kutubu Bosay Open o ilektoret em yet na Nipa ilektoret em yet seperetim olsem.

Tenkyu.
Wapu Mapurt
Kogop, SHP

Dia Wantok,
MI laik autim wari olsem ol bilong mipela long Is Nu Briten no gat luksave long mipela long boda. Ileksen i kam klostu na mipela i les long lukim wanpela man. Mipela i mekim bikpela wok long Leo Dion na nau em i lus ting long mipela.

Tenkyu.
Sedoish

Dia Edita,
MI painim wanpela pikinini man bilong mi we mi lus kontek wantaim em long 2013 na mi hat long painim em.

Em yet stap long Kukul ples long Karkar ailan Madang provins. Yu husat i lukim em dispela pepa Wantok Niuspepa, plis sapos yu ken toksave long em nem bilong mangki ya em Francis Sukek Lang long ringim mi long dispela fon namba, 7130 4479. Mi papa bilong em, mi stap long Moro Lake Kutubu, SHP.

Tenkyu.

Teks i kam long:
71845906
na autim tingting...

Vscan masin mekim bikpela wok long rural haus sik



Pailot projek bilong Tribal Foundation na GE wantaim Enga provinsal gavman i wok long go strong moa yet. Dispela long wanem PNGTF na GE i wokim wanpela pailot projet bilong ol Vscan masin we i save yusim batri tasol na isi long karim go long olgeta hap.

Dispela Vscan masin em GEPNG i kisim namba wan taim kam long PNG na Tribal Foundation i helpim long bringim go long ol liklik helt senta long Enga wantaim helpim bilong provinsal gavman na Gavana Peter Ipatas.

Dispela pailot projet i stap longpela taim nau na sampela ol bikpela dokta bilong Amerika i bihainim dispela Vscan masin i kam long PNG na go antap long Enga long lukim sapos dispela Vscan masin i helpim ol pipel long ples.


Dispela tupela dokta em long Dokta Nancy Louise Kerr na Dokta Mark Hauswald, bilong wanpela bikpela haus sik long Amerika bin raun kam long PNG long lukim ol haus sik na sekim wok bilong Vscan masin insait long kantri.

Long poto, dokta Mark na Dokta Nancy i soim wanpela liklik Vscan masin long sampela ol nius manmeri taim kantri manesa bilong GE Peter Loko na oporesen dairekta bilong Tribal Foundation Michelle Hau'ofa i lukluk.

Vscan masin em liklik na isi long karim na raun long bikbus na solwara tasol em save mekim bikpela wok long helpim sevim laip bilong ol mama bel, bun bruk na planti moa samting dispela liklik masin save mekim.

Poto na Stori Nicky Bernard.

Em nau! Ol pikinini i ken painim rot i go long ples wantaim Wantok lain...



R S V G R N T E L R S E F N R P A T R
 K U L E R G R N A G
 F L M N S L A D F H G B K R
 N B A O U P N L A V I P A A I F Z R X

PAINIM WOD PILAI

- Ol wod lista:**
- | | | |
|-------------------|------------------|-----------------|
| SOLMARASIN | OLABOI | FONDE |
| KOKONAS | SOLAPIM | HAISAPIM |
| JEMAN | FEBRUERI | KRAMSEL |
| BAKLAIN | PLANTESIN | PIPIA |
| ARASAIT | SPAREN | BIKHET |
| HINISIS | TIANG | FAIPELA |
| LUSIM | DABOLIM | KARIBU |

O F G G T V E G A R Z D T C E K C D M E O D N T N
 E E S B H Y N F H C P R E I C X O M E T S D S J A
 N P E P X D E O A A H P N F D R H L A H I S F U B
 O T C S D P C N T E O H P B M J X H S N S V B G X
 H U U N T E M W G E E I O N S I X A I E G B A D G
 S E I E F I S N O A V T K L S J P L V N M A K D I
 A E E G T M S W I S G K D S O T I I R A I S L U Z
 N Z A A L N A Y R R T C O X R E D K Q F P S A S W
 C E K J J L O B E Z M I L I Z N Q S N E E L I S R
 H P B O K Z N X K G G S A A L N B A P B S T N S D
 R T S H K E B E U K P M B N U L G A H R O I F H Y
 L E E S R O S Q I B I L O B G H H E C U S S M G L
 X S E A A F N E A D P N I T E S P C L E A O A O S
 V E P R M X R A K R I R S G P E C N T R I L V E E
 S S P A S G J F S X A K O R I C E N D I T A F J E
 B I K H E T E E A K A S H A I S A P I M I P O A M
 D A B O L I M L U S I M A S O L M A R A S I N T Z
 S G I R V N A D W J C F A I P E L A M T R M D L T
 X M X O R S N L S E O R S B T O I W E E N R E Z S
 Z D D B H E X M F G O E E O N W M N E P D M R C P

STORI BILONG TUMBUNA

Man i kamap blakbokis

Long Ilahita wanpela man wantaim meri bilong em tupela i go katim bus. Na wanpela welmeri i stap insait long hul bilong wanpela diwai. Em i kam ausait na i planim bek dispela bus. Na bus i kamap i stap olsem bipo.


Tupela i laik i go bek bilong lukim wok bilong tupela. Tasol tupela i lukim bus i kamap i stap olsem bipo yet. Na tupela i katim gen dispela bus. Katim pinis, orait tupela i go long ples. Olsem tasol dispela welmeri i mekim olsem bipo, na bus i sanap gen. Tupela marit hia i lukim dispela na bel bilong tupela i hat tru. Meri i go pinis long ples, na man bilong em i was i stap. Nau em i painim gut dispela welmeri i planim bus gen.

Na man i krosim welmeri ya. Na welmeri i tok: Yu no ken kilim mi. Yu kam lukim ples mi i stap long en. Orait welmeri i soim em sampela gutpela bilum. Em i wokim bilong grisim bel bilong man. Orait, man i lukim na i laikim em tru. Na em i katm dispela diwai welmeri i stap insait long en, na kisim i go long ples.

Man i putim welmeri insait long haus Tambaran bilong ol man na i lukautim em gut. Orait, dispela meri i wokim planti bilum na i givim long planti man. Na ol i laikim dispela welmeri tumas. Na ol meri tru bilong ol i mekim ol i kamap namba tu tasol. Bihain olgeta man i go long bus, long raunim pik na ol meri tasol i stap long ples.

Na ol i salim wanpela meri i go antap long kokonas na kisim kulau. Em i pundaun na dispela welmeri i stilim kulau bilong ol. Orait, ol meri i painim dispela welmeri i stilim kulau. Nau ol meri i kukim haus tambaran na welmeri i paia olgeta pinis. Ol man i kam bek long bus, ol i lukim sit bilong paia tasol i stap. Ol man i belhevi na wari tru long dispela welmeri. Ol i kisim sit bilong dispela welmeri na ol i waswas long en. Na ol i kamap olsem blakbokis na flai i go pinis. Na ol meri tasol i stap long ples bilong ol stret. Olsem na ol blakbokis i kamap long Ilahita.

Kifas Kundalimuna Ilahita



Ansa bilong Wod Pilai isu 2190

U G R V G D B E W P R E I J T S C T E B D A R M A
 F Z Y S T E S N W N I M D I N S A H G Y H I G E Q
 E M T T H C R V I R U I E M L S F T F A I Z Z I I
 X N C F N J S S N K C J D E I N E G M E A S T Q C
 X R E S F V N I M A B O A C U D E N M F I I I E P
 G A R I I E S E H L B T D N O H F S P D M R P M N
 I A N S L M T Z N E E E E F D A U K H A E T D A I
 E L S P R E E M A N M P W M R B S A M U R Z G I T
 V T L P E C X N W D L E Y E W U H L N D R O M W Q
 N E Y H K E A I I A P C D H K N I A P A S L A I N
 I W N A A J B H A E A E L A W P J P C U F S O N V
 R R R T E D H N Z T S D V P L I A I A N D E W D N
 A N D R V P A I G U M I V A W S E M A Q U B P O M
 G E A W S M K E C E C L A N N Y I S I P A S I N E
 Z Y A C E M R P I T J L R L D S T M A U N T E N P
 C U H X P N N N L H E P E A A A T E G E M O O T M Z
 G S P C A Y H N P P A O S M A N M L A N P E G Z E
 A T A S U R L E T S G T A W S T I L I M I E X G T
 T A E A R E B O R I M M I H F S O S M S E M L L E
 S L O T A U S E N S A A M M H P Z C F O A O R A I



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

PNG namba tu win egensim SABL

Caroline Tiriman i raitim

WANPELA papa graun na Siaman bilong Turubu Eco Forestry long Is Sepik provins i tok tenk yu long gavman na ol pipel bilong Australia na ol narapela kantri wantaim kot sistem long PNG i helpim ol i winim bek graun bilong ol long ol foren bisnis kampani.

Gabriel Molok i mekim dispela toktok bihain long Suprim Kot i givim bek ol graun bilong ol papagraun em ol i bin kisim nating aninit long dispela Spesel Egrikalsa na Bisnis Dis long namba tu taim long dispela tupela wik. Ol pipel bilong Turubu i kisim dispela gut-

pela nius hap aste taim Suprim Kot i bin luk-save long tingting bilong Lowa Kot long 2014 olsem Sepik Oil Palm Plantation Ltd (SOPL) i bin rong long kisim graun bilong ol pipel.

Bikpela kampani em i save mekim ol wok loging long PNG em i wanpela bisnis kampani bilong Malaysia Rimbunan Hijau i papa long dispela kampani Sepik Oil Palm Plantation Ltd (SOPL).

Long wik i go pinis, Nesenel Kot i bin givim bek graun i go long ol papa graun bilong Is Nu Briten provins em wanpela kampani, East New Britain Palm Oil Limited i bin kisim nating long kirapim Palm Oil long en.

Pacific Stella magazine Runway 2016 So

John Papik i raitim

MERI husat i go pas long Stella Magazine long Pasifik i tok em i sori olsem ol kain ripot i save i kam aut long ol nius i save daunim lukluk bilong ol meri.

Amanda Donigi i tok em i save kros stret long ritim long niuspepa o harim long redio we ol nius ripot i save kamap long ol meri em planti taim i no save toktok long intelligence o save bilong ol.

Amanda Donigi i tokaut long dispela wari bilong en taim Stella Magazine na ol narapela bisnis lain wantaim tu ol lida meri long PNG i holim Fashion Runway 2016 em i go het long dispela wik

long Pot Mosbi. Dispela so i helpim tu long soim wok bilong ol disaina o ol meri na man i save mekim na putim stail bilong ol long ol klos o dres, trausis, na planti ol narapela samting.



Tupela yangpela PNG meri i putim ol bilum dres.

PNG Hela Provins i mas gat Polis operesen



Wanpela lain polisman bilong PNG.

Enga Polis i statim enti sanguma yunit

Caroline Tiriman i raitim

POLIS komanda long Wabag long Enga provins i statim dispela yunit long daunim wari bilong Sanguma vailens.

Polis long Enga provins i statim pinis pis wanpela yunit a wok bilong traim daunim wari bilong bagarapim na kilim nating ol narapela pipel bihainim ol tokwin bilong Sanguma o soseri.

Ol i tok ol i mekim dispela samting long wanem dispela

kain pasin bilong sutim tok nating na bagarapim ol narapela long tokwin bilong sanguma i wok long kamap bikpela long provins.

Komanda bilong polis stesin long Wabag, Epenes Nili, i tok em yet na Provinsal Polis Komanda, George Kakas i givim pinis ol mobail pfon namba bilong ol i go long ol pipel long ringim tupela na toksave sapos ol i lukim ol pipel i kamapim vailens nating long ol arapela pipel.

Caroline Tiriman i raitim

PROVINSAL polis komanda long Hela provins i askim pinis nesenel gavman long kamapim wanpela bikpela polis operesen long provins long traim stopim ol pait namel long ol lain wanpisin.

Askim bilong Komanda Michael Welly i bihainim tu askim bilong ol narapela pipel bilong provins long gavman i kamapim wanpela

stet ov imejensi long Hela.

Hela provins i gat bikpela wok bisnis bilong LNG projekt em kot bilong em i stap olsem 19 bilien US dola. Em i bin bungim tu sampela hevi tupela wik i go pinis taim ol papa graun i bin pasim dispela ges plent.

Komanda Welly i tok ol dispela traibal pait i kamapim bikpela hevi long ol pipel, pikinini na ol wok bisnis long provins.

PNG papagraun i winim SABL pait

Caroline Tiriman i raitim

SAMPELA lain papa graun long Is Nu Briten provins i bin winim kot egensim gavman na ol foren bisnis kampani husat i bin kisim nating graun bilong ol aninit long dispela kain wok em ol i kolim Special Agriculture and Business Lease oa(SABL).

Nesenel Kot long Kokopo i bin tokaut long Fonde long wik i go pinis olsem dispela tok orait bilong larim kampani East New Britain Palm Oil Limited i kisim na yusim graun bilong ol Baining pipel long Gesel distrik i bin rong na ol pipel i mas kisim bek graun bilong ol. Dispela Special Agricul-

ture and Business Lease i kamapim planti hevi tru long ol papa graun long kantri, em planti long ol i no sapotim dispela kain wok.

Praim Minista Peter O'Neill i bin tokaut tupela yia i go pinis olsem em bai givim bek ol graun em ol kampani i bin stilim long ol pipel, tasol i kam inap nau planti pipel i no kisim bek yet graun bilong ol.

Kenn Mondiai, em i Eksekutiv Opisa bilong Partners with Melanesians na ol i save pait long helpim ol pipel i lukautim graun bilong ol, na em i tokim Redio Australia olsem ol i amamas tru long dispela tingting bilong kot.

OI UPNG sumatin lida i no nap go bek long skul



Ekting UPNG Vais Sansela, Dokta Nicholas Mann.

Caroline Tiriman i raitim

SAMTING olsem 26 studen lida bilong Yunivesiti bilong Papua Niugini (UPNG) bai no nap go bek long skul bihainim oda bilong Yunivesiti Kaunsil.

Dispela bai kamap maski sapos planti sumatin na sampela papamama na ol wokman-meri bilong UPNG bai holim wanpela rikonsiliesen o pasin bel isi long dispela wik long Mosbi bilong statim sotpela Akademik skul yia bilong ol.

Plantu sumatin long ol Yunitek, Yunivesiti bilong Goroka bilong Goroka long lsten Hailans provins na UPNG long Mosbi i bin wok long protes long mekim Praim Minista Peter O'Neill long lusim wok bilong en.

Ol i bin laikim em long lusim wok bilong em bihainim ol tokwin bilong korapsen.

Ekting Vais Sansela, Dokta Nicholas Mann i tokim Redio Australia olsem Kaunsil i no laikim ol dispela sumatin long wanem, ol i bin statim ol trabel long Yunivesiti.

Vanuatu i holim miting bilong ol yangpela

John Papik i raitim

WARI bilong ol Yut long Pasifik i stap yet olsem bikpela wari na long Vanuatu dispela wik, i bin holim namba wan bikpela forum bilong ol Yut.

Dispela miting em long painim wei long mekim ol yangpela i ken stap insait long gutpela pasin, painim wok na olsem ol i ken helpim long kamapim ikononik development long kantri.

Vanuatu Praim Minista,

Charlot Salwai i bin autim dispela toktok taim em i opim dispela Yut Forum long Port Vila dispela wik.

Anita Samana, Gavanens Lidasip Kodineta wantaim Oxfam Vanuatu i tokim Redio Australia olsem as tingting bilong dispela miting em bilong helpim ol yangpela pipel long bihainim wanem kain samting em ol laikim long sait bilong painim wok na tu mekim ol liklik bisnis bilong ol yet.

PACER Plus i nogut long Pasifik: Sampela lida i tok

WANPELA ten tri ol kantri bilong Pasifik i stretim na pinisim ol toktok bilong oraitim nau dispela wok bung bilong tred em ol i kolim Pacer Plus, o Pacific Agreement on Closer Economic Relations.

Ol dispela kantri i wok long toktok na lukluk long dispela kain wok bung long 7-pela yia pinis na ol i ting bai ol i sainim ol dispela tok orait long mun Novemba.

Papua Niugini i wanpela kantri tasol em i no laik stap insait long dispela wokbung.

Fred Namo em i loya o ligel opisa long opis bilong Sif Tred Edvaisa bilong Pasifik long ol toktok wantaim Australia na Nu Silan, i tok dispela tok orait em i bikpela samting tru long

wanem, em bai bringim ol gutpela samting long ol pipel bilong rijon.

Tasol sampela mansave long Pasifik rijon i wok long wari olsem dispela kain wokbung bilong Pacer-plus bai helpim tasol Australia na Nu Silan. wanpela long ol dispela mansave em Gavana bilong Oro provins, Gary Juffa husat i tok em i amamas olsem PNG i no stap nau long dispela kain wokbung.

Narapela man husat i no laikim dispela wok bung wantaim Australia na Nu Silan em bisnisman bilong Vanuatu, John Salong. Emi tok olsem, em bai hat long ol pipel bilong Pasifik i i save salim ol kaikai na ol narapela egrikalsa samting i go long dispela tupela kantri.

Ramu NiCo (MCC) givim K10,000 long Madang Invesmen Forum

MADANG Provinsal Edministreta, Daniel Alo i tokaut olsem nikel/kobalt main developa, Ramu NiCo Menesmen (MCC) em wanpela bikpela stratejik developmen patna insait long Madang provins.

Mista Alo i mekim dispela toktok long las wik Fonde taim Presiden bilong Ramu NiCo (MCC), Wang Jincheng i givim K10,000 sekmani i go long Mista Alo wantaim ol komiti bilong namba wan Madang Bisnis Samit (Kibung) we i stat asde (Trinde, Septemba 7) long Madang Risot Hotel.

Dispela namba wan bisnis samit em Ramu Developmen Faundesen i ogenaisim long traime bringim ol nupela investa long luksave long Madang provins long wokim bisnis.

Mista Alo i makim maus

bilong samit komiti long givim bikpela tok tenkyu i go long Ramu NiCo (MCC) olsem namba wan bikpela bisnis haus insait long Madang provins long givim sapot, maski olsem nau em planti kampani i wok long bungim hevi long sait bilong mani.

Presiden bilong Ramu NiCo, Mista Wang long taim em i givim sek mani i tok olsem Ramu NiCo i amamas long stap insait long dispela bisnis invesmen samit long Madang bikos em bikpela investa long Madang na em bai amamas long tokaut long ekspirians bilong en. Narapela samting tu em dispela kain invesmen samit i ken kamapim ol wokbung na poroman wantaim Madang provinsal gavman.

Mista Wang i tokaut long ol lain bilong Madang


provinsal edministresen olsem, MCC em wankain olsem olgeta bikpela maining kampani long wol we nau i bungim hevi long sait long prais bilong metal nikel we i stap daunbilo tru nau.

Em i tok MCC i luksave olsem em bikpela investa long Madang na i givim sapot long Madang gavman long kamapim dispela bisnis investmen samit long promotim Madang.

Mista Wang i tok nau olsem prais bilong nikel em daunbilo tru insait long wol maket, ol pipel bilong Madang olsem ol papagraun, na Madang provinsal gavman i mas luksave na sapotim projek, na i mas gat moa komunikesen na wokbung i mas stap oltaim.

Mista Alo i tok Madang olsem provins na gavman i amamas long kamapim dis-

pela bisnis invesmen samit long soim ol investas wanem samting gavman i laikim ol i lukim na kamapim long provins.



RamuNiCo (MCC) Presiden, Wang Jicheng i givim K10,000 sekmani long Madang PA, Daniel Alo long sapotim Madang Bisnis Samit.



Ol lain bilong Madang provinsal edministresin wantaim Ramu NiCo Menesmen (MCC) lain. Poto: James G. Kila

Lukluk long Esia maket, Parkop i tok

PNG i mas lukluk long opim nupela maket long Esia, NCD Gavana Powes Parkop i tok.

Mista Parkop i tok Indonesia, Filipins, Malaysia na Saina i gat bikpela maket we PNG i ken yusim dispela sans long salim planti samting i go long dispela ol kantri.

Mista Parkop i autim dispela toktok bihain long bikpela pait toktok i kamap namel long Fiji na PNG taim Fiji i les long larim PNG i salim Ox & Palm mit, Snax bisket na Trukai Rice.

"Yumi no ken westim taim na kros wantaim Fiji. Sapos Fiji i les, Indonesia i stap long arapela sait long boda.

"Indonesia i gat 250 milien manmeri na Filipins i gat 100 milien manmeri. Fiji i gat 700, 000 manmeri tasol.

"Sais bilong maket long Fiji em i liklik taim yu skelim wantaim ol kantri long Esia," Mista Parkop i tok.

Em i tok planti ol manmeri long Indonesia i save laikim mit, bisket, nudels, rais na ol

prodak bilong PNG.

"Ol manmeri Indonesia i save laikim musik CD bilong PNG tu," Mista Parkop i tok.

Em i tok gavman i no ken westim taim na kros wantaim Fiji sapos ol i les long larim ol prodak bilong PNG.

"Yumi gat gutpela poroman wantaim Indonesia, Filipins, Malaysia ana Saina. Dispela poroman i ken helpim kantri bilong yumi long salim planti samting i go long bikpela maket bilong ol," Mista Parkop i tok.

Em i tok planti ol manmeri long Esia save kaikai wankain kaikai olsem yumi ol manmeri PNG i save klaikai na dispela em i bikpela sans tru long yumi salim ol gaden kaikai tu i go long hap na salim.

"Ol manmeri long Esia i save kaikai kaukau, taro, yam, banana, na arapela gaden kaikai wankain olsem yumi.

"Em i sans long yumi mekim treid na bisnis wantaim ol," Mista Parkop i tok.

Ol vanilla baia no givim givim gutpela praisnau prais wok long go antap

James G. Kila i raitim

WANPELA lokal man husat i save go pas long baim drai vanilla bin long Madang na Sepik i tokaut olsem prais bilong vanilla nau i go antap tasol planti ol namelman i wok long giaman na baim vanilla long ol fama long daunbilo prais.

Andrew Bonny, husat i save baim vanilla long Madang na Sepik provins i tokaut olsem kampani bilong em nau i wok long wokim awenes long ol ples insait long Madang olsem prais bilong vanilla nau i go antap na ol fama i mas redim gut ol vanilla bin na salim na kisim gutpela mani.

Bonny tok olsem nau yet kampani bilong em i wok long baim drai vanilla long long K200 long wanpela kilogram.

Olsem na em i mekim strongpela toktok i go long ol fama long Raikos olsem ol no ken salim nating ol vanilla bin i go long ol namelman husat nau i go long hap na baim vanilla long K120 long wanpela kilogram.

Bonny i tokaut olsem dispela ol namelman i go baim vanilla long Raikos na ol arapela rurel ples long K120 long wanpela kilogram na bihain ol save go salim long em gen na kisim K200 long wanpela kilogram. Dispela em i no gutpela pasin.

Bonny i laikim ol fama mas pikim vanilla bin long gaden bihain long 9-pela mun stret taim em i redi gut. No ken rausim bin taim em 6 o 7 mun tasol. Dispela bai bagarapim kwaliti bilong vanilla bin taim em drai.

Bonny i tok tu olsem ol fama no

ken mekim wankain ol rabis pasin olsem bipo taim prais bilong vanilla i go antap na ol i hariap hariap na pikim ol yangpela bin.

Em i tok fama mas larim bin i redi gut insait long 9 mun na ol i pikim na draim gut.

Bonny i bin mekim awenes bilong em long NBC Redio Madang.

Em i tok pastaim em i save go baim ol vanilla long ol fama long Tangu long Bogia distrik na ezen bilong em long hap em David Buras, na long Trans-Gogol em ezen bilong em em Libert.

Bonny nau i mekim bikpela tok save i go long ol fama long Aiome, Tangu, Josephstaal na Simbai olsem ol no ken salim vanilla i go long ol namelman husat save givim daunbilo prais.

PNG Air lukluk long Jayapura flait

PNG Air i plen long kamapim intenesenel flait i go long Jayapura long Indonesia, Sif Eksektiv Opisa, Muralee Siva i tok.

Mista Siva i tok PNG Air i plen long yusim Kagamuga Intenesenel ples balus na opim nupela Mt Hagen-Jayapura rut.

Dispela ea sevis bai givim sans long ol manmeri long Hailans rijon i mekim bisnis wantaim ol manmeri na bisnis haus long hapsait long boda.

Rot bilong kisim ol PNG turis i go long Jayapura tu bai

op taim PNG Air i kamapim dispela nupela sevis.

Dispela bai namba wan intenesenel flait bilong PNG Air bihain long PNG Air i stopim ol intenesenel flait bilong em i go long Cairns, Australia long yia 2013.

Mista Siva i tok ol pepa wok long PNG sait i pinis tasol ol lain long Indonesia i wok long isi isi liklik na dispela i wok long holim bek ol samting.

"Mipela i bin plen long kamapim intenesenel flait long dispela yia tasol ol pepa wok long Indonesia i no

pinis hariap," Mista Siva i tok.

Em i tok PNG Air bai yusim nupela ATR 72-600 balus long kamapim dispela nupela sevis namel long tupela kantri.

"Mipela i lukluk long larim ATR balus i mekim dispela ran. Mipela i plen long larim tripela flait i kamap long wanpela wik," Mista Siva i tok.

Em i tok PNG Air i no gat narapela plen long kamapim Intenesenel sevis tasol bihain taim ol bai lukluk long arapela nupela rot.



Nupela ATR 72-600 balus bilong PNG Air bai ran namel long Mt Hagen na Jayapura long Indonesia.

Moa long 15,000 manmeri i kisim hat taim



Mista John Aweta, em i viles lida long Ainandoa eria long Menyamya Distrik, Lae Morobe Provins, i tokaut long hangre long bel bilong em long kisim gavman sevis.

MOA long 15,000 manmeri long Ainandoa long Kapao Lokal Level Gavman, Menyamya Distrik long, Morobe Provins i kisim hat taim long ol gavman sevis.

Ol sevis olsem haus sik na elementri skul inap long haikul i stap pinis long dispela hap tasol i no gat rot long bringim ol kago i go long hap.

Viles lida, John Aweto, i tok, ol tisa na wok lain long haus sik i save les long go wok long hap bikos rot em i bikpela hevi we ol i save painim hat long go kam long taun.

“Mipela i gat 10-pela kaunsil wod na 42 viles insait long Ainandoa eria na mipela i save kisim bikpela hat taim.

“Mipela i no gat sampela skul man long hap bikos, i no gat rot na ol tisa i save les long kam long hap na skulim ol pikinini bilong mipela.

“Planti lain bilong mipela i save dai long hap rot taim ol i save sik bikos i no gat rot bilong kar long kisim ol i go long haus sik.

“Na tu, mipela i gat planti kopi na ol narapela kaikai long gaden, tasol hat long karim i go long taun na salim bilong kisim mani na lukautim famili. Ol dispela gutpela kaikai i save sting olgeta taim,” Aweto i tok.

Em i tok moa olsem, taim kar i save lusim ol long hap rot, ol i save wokabaut inap long 48 aua long winim 637 kilomita bilong go kamap long ples bilong ol.

“Memba bilong mipela, Benjamin Philip, i wok hat tru long mekim wok, tasol mani gavman i givim em i sot long givim sevis long olgeta hap bilong Menyamya.

“Mi olsem viles lida bilong dispela eria, i laik bai Praim Minista i ken sapotim memba bilong mipela na kirapim dispela eria bikos mipela ol pipel bilong em i kisim bikpela hat taim i stap.

“Sapos, gavman bilong tude i helpim memba bilong mipela, Benjamin Philip, wantaim mani mak long 100 milien kina i ken inap long mekim rot i go long dispela eria na mipela ol pipel i ken lukim lait.

“Na, wan tu tasol mipela i ken baim takis na bekim dispela mani taim mipela i salim ol kopi na ol gaden kaikai, na kisim mani,” Aweto i tok.

Ol rurel ples long Sauten rijon nambis kisim medikol saplai



Ol kago 19 CURE Kit i go antap long dingi long ol i kisim i go antap long sata bot bilong Spot Pising PNG. Michelle Hau'ofa, PNG Tribal Foundations Dairekta bilong Operesens i sindaun long poret bilong dingi wantaim Minista Tobias Kulang long kisim ol CURE kit i go long sata bot. Foto: Nicky Bernard.

PNG Tribal Foundation bai bringim ol medikol saplai i go long ol rurel ples long ol nambis namel long Oro Provins i go long Westen Provins wantaim helpim bilong Spot Pising PNG na Ministri bilong Turisem.

Wok patnasip bilong dispela tripela ogenaisesen bai saplaim 19 CURE Kit i go long ol ples i stap longwe tru insait long ol wara na ol solwara long Sauten koslain.

PNG Tribal Foundation i donetim dispela 19 CURE Kits. Wan wan bilong ol dispela CURE kit i gat ol medikol saplai long mani mak bilong PGK6,000.

PNG Spots Pising bai bringim ol dispela medikol saplai go long ol ples ol i go long en wantaim sata bot “K20”, we i makim “Kikori i go long Oro”. Dispela wok marimari i kisim helpim long Minista bilong Kalsa na Turisem, Tobias Kulang. Mista Kulang i gat bikpela bilip long turisem indastri bai helpim developmen bilong ol rurel eria.

Minister Kulang i tok, “Mi amamas long lukim ol pipel i yusim turisem olsem rot bilong bringim sevis long ol pipel bilong yumi. Kongresulesens long

PNG Tribal Foundation na Spots Pising PNG long dispela gutpela patnasip.”

PNG Tribal Foundation Dairekta bilong Operesens Michelle Hau'ofa i tok, “Mipela i mas kamap wantaim nupela wei bilong bringim sevis long ol pipel bilong yumi husat i stap long ol longwe ples na patnasip bilong mipela wantaim Spot Pising PNG em i gutpela piksa tru.

Em i soim narapela we bilong Tribal Foundation model bilong multi-sekta patnasip we ol NGO, gavman olsem Ministri bilong Turisem na turisem indastri wantaim Spot Pising PNG i wok wantaim long kamapim.

“Mipela i sapotim sastenebel we bilong Sport Pising PNG long mekim dispela kain pasin bilong helpim ol pipel wantaim rot bilong turisem we bai stap longpela taim bihain. Mipela bilip ol dispela medikol ikwipmen bai kamapim strongpela komyuniti rilesensip.”

Fred Taligatus, Lid Gaid bilong Sport Pising PNG, i bin stap long kisim ol 19 CURE Kits na ol bai bringim i go long ol ples long taim ol i go aut wantaim sata bot bilong ol, liklik taim bihain.

WHITE TUNA FLAKES
DIANA White

WHITE TUNA insait **K 2.20**

DIANA
Barbecue Flavour

*Tasty and Flavourful
White Tuna for Everyone!*

Manufactured by:
RD Tuna Cannery Ltd.

Ol Raider i daunim ol Tiger



Josh Papalii i tok tenkyu na amamas long Jarrod Croker bihain long em i putim trai bilong ol Canberra Raider egensim ol Wests Tiger.

JOSH Hodgson, husat i pilaia bilong ol Canberra Raider i bringim ol Raider i go antap long top tu wantaim 52-10 poin we ol Wests Tiger bai no inap go insait long top eit.

Ol Raider bai pilai egensim ol Cronulla Shark long namba wan wik bilong ol fainal resis bihain long ol i putim 9-pela trai long ai bilong 18,634 manmeri long

Leichhardt pilai graun long long las wik Sande.

Tasol, ful bek bilong ol Raider, Jack Wighton, i no bin pilai long em i bin givim wanpela strongpela solda sas long Joel Edward bilong ol Tiger.

Canberra i bin stap pas long namba wan hap, 30-4, we Josh Papalii i putim tupela trai.

Ol Tiger i no bin pilai gut taim ol i stat pilai. Ol i bin stap long bikipela presa in-

sait long 40 minit bilong namba hap bilong resis.

Moses bilong ol Tiger i traime hat long strong ol pilaia bilong Tiger na skruim skoa, tasol stail bilong Hodgson i daunim em.

Taim Jordan Rapana i putim namba tu trai bilong em na namba 20 long dispela sisen, olgeta manmeri i kirap na go aut long get.

Ol Eel i pinisim NRL sisen na winim ol Warrior ...ol Panther i daunim Manly

Ol Parramatta Eel na Nu Silan Warrior i pinisim Nesenel Ragbi Lig (NRL) sisen bilong ol we Parramatta i daunim ol Warrior, 40-18.

Ol Warrior i bin mekim planti asua na dispela i namba foa stret lus, we ol Eel i bin putim planti trai.

Na ol Warrior i pinisim 2016 NRL sisen long namba 10 ples na ol Eel i pinisim sisen wantaim amamas.

Long wankain taim, ol Penrith Panther i daunim ol Manly na ol bai go insait long namba wan wik bilong eliminesen fainal egensim Canterbury Bulldog.

Dispela em i namba faiv stret lus bilong ol Sea Eagle na ol i pinis long namba 13 ples long lata.

Leulie i takolim Edwards.



Pouille i nokim aut Nadal long US Open

LUCAS Pouille i daunim Rafael Nadal long namba foa raun bilong US Open tenis wantaim faiv-seta.

Nadal i stap long namba foa set na i kisim strong long go long namba faiv set, tasol Pouille i kamap namba tri man bilong Frans long go antap long las eit bilong dispela yia wantaim 6-1, 2-6, 6-4, 3-6, 7-6 (8/6) na i win. Pastaim, Gael Monfils i

pinisim wantaim 10 set long kwata fainal wantaim stret set win egensim Marcos Baghdatis.

Long resis bilong ol meri, Caroline Wozniacki, i rausim Madison Keys wantaim 6-3, 6-4, na i win.

Wozniacki i bin kamap wina bilong US Open long yia 2009 na 2014, na long dispela yia, em i kamap wina gen.

Ennis i fri long pilai kwalifai fainal

HUKA bilong Cronulla Shark, Michael Ennis, i fri long pilai Nesenel Ragbi Lig kwalifai fainal egensim ol Canberra Raider bihain long em i no kisim wanpela sas long mekim wanpela strongpela takol long faiv-eit, Blake Green, bilong ol Melbourne Storm.

Ennis i givim strongpela solda sas long Green bihain long em i salim bal i go long poro pilai bilong em, Cheyse Blair, long

putim trai we ol Storm i daunim ol Shark, 26-6, long AAMI Park.

Green i slip long pilai graun na ol i go long ol dokta bilong Storm, tasol bihain em i pilim orait na i go insait long pilai.

Kosa bilong ol Cronulla, Shane Flanagan, i tok olsem Ennis i no paitim Green long het, tasol bai ol i lusim dispela long han bilong ol rivi komiti bilong resis.



Michael Ennis i kisim bal i go insait long banis bilong ol birua.

Adelaide skul program bilong ol etlit i kamap

WANPELA nupela program long Adelaide, Australia i salim ol namba wan etlit long skul bilong ol i ken save long olgeta samting long laip.

Dispela program i luk olsem ol etlit i ken toktok gut long ol salens bilong ol taim ol i pilai.

"Dispela program i save, kisim gep bilong helt, welbing, sosel, na ol toktok bilong famili," Ektiviti kodineta bilong RSL, Mark Reidy, i tok.

Program em i wankain long projek i bin kamap long US na Canada, na em bai stat long Adelaide, Australia.



Caitlin Ward na Brendan Larkin long Adelaide Super Drome.



Rafael Nadal i no pilim amamas long taim bilong US Open resis.



Wok Meintenens long Ramu NiCo Paiplain arere long Haiwe

RAMU NiCo Menesmen (MCC) Ltd i wok nau long stretim wanpela seksen bilong paiplain bilong en arere long Madang-Ramu Haiwe em 42 kilomita longwe long Madang taun.

Dispela wok em ol kontrakta bilong en MCC 19 i mekim wok long sanapim strongpela simen pos long apim na holim strong paiplain i stap arere long rot klostu long Kawawar maket.

Dispela 135 kilomita paiplain em save karim ol graun nikel/kobalt I go daun long Kurumbukari Main antap long Usino-Bundi distrik i go daun olgeta long nambis long Basamuk Rifaineri long Raikos distrik long Madang provins.

Ramu NiCo (MCC) i tokaut olsem wok em wanpela saveman o ensinia i disainim dispela wok long sanapim strongpela ol simen pos na em bai strong na no gat bagarap i kamap long rot na envairomen.

Long las wik kontrakta i bringim ol bikpela masin bilong en long wok i go daun long eria na i putim ol sefti sain long rot. Dispela ol sefti sain ol i putim em long tok-save long ol kar na manmeri long luksave long pasin bi-

long sefti na was gut taim ol i go klostu long dispela eria.

Ramu NiCo (MCC) i save soim gutpela pasin taim i gat hevi long haiwe rot na oltaim i save yusim risos bilong en long stretim rot bagarap. Ol dispela wok em Nesenel Woks Dipatmen i mas mekim, tasol Ramu NiCo i save wokim bikos Woks i no gat inap risos long mekim wok.

Moa long en tu Ramu NiCo i mekim dispela wok long soim gutpela komyuniti sevis wok bikos ol wokman bilong en na ol sevises em save nidim i save yusim dispela wanpela bikpela rot tasol.

Long las yia na ol yia i go pinis Ramu NiCo i bin helpim long stretim rot i bagarap tru klostu long Iguruwe viles. Kampani i helpim tu long bipo taim bikpela wara i tait na bagarapim ples klostu long Naru.

Wok long Naru tait-wara i lukim Ramu NiCo woklain yusim risos bilong en long stretim sait bilong wara long riva no ken bagarapim ol gaden kaikai bilong ol pipel.

Long dispela taim Ramu NiCo i yusim ol bikpela wok masin bilong en yet long mekim wok.




Ramu NiCo kontrakta MCC 19 i bringim ol masin long mekim wok klostu long Kawawar maket.



Ain reil banis long rot long soim sefti.

Poto soim wok long paiplain na seksen bilong Madang-Ramu Haiwe.





Edministreta bilong Papua Niugini Nesenel Ragbi Lig (PNGNRL), Stanley Hondina, i tok tenkyu long ol sapota na sponsa i stap wantaim long bungim pinis bilong resis wantaim gutpela mak.

Hagen Eagle bai no inap pilai long tripela yia

WAMP Nga Maun Hagen Eagles klap long Digicel Kap resis bai no inap pilai long tripela yia, we ol bai stap aut long yia i kam, 2017 i go inap long 2019.

Dispela disisen i kamap bihain long ol Bod bilong Papua Niugini Nesenel Ragbi Lig (PNGNRL) i bung na toktok long pait i kamap namel long ol Eagle na Agmark Rabaul Guria taim tupela i pilai semi-fainal.

Edministreta bilong PNGNRL, Stanley Hondina, i tok, "Olgeta Bod bilong PNGNRL i bin bung long las wik Fraide, Septemba 2, 2016, long toktok strong long asua i kamap bihain long pinis bilong resis."

"Ol Bod i lukim opisal vidio bilong TVWan long semi-fainal resis, na tu, ol i lukim long wanem as tingting dispela pait i kamap long pinis bilong resis."

Em i tok, bihain long ol i lukim dispela vidio, ol i tingting gut na bihainim long bilong ragbi lig bilong kamap wantaim ol penelti we, ol

Eagle bai malolo insait long tripela yia.

"Ol Eagle i kamap namba tri ples bilong Digicel Kap resis, tasol ol bai no inap long givim K20,000 prais mani bilong ol bikos ol bai yusim dispela mani long baim sampela fesiliti we ol lain i bin bagarapim long taim pait i kamap," Hondina i tok.

"PNGNRL Bod i stopim asisten trena bilong ol Eagle, Stanley Akinu, we em bai no inap wok aninit long olgeta liklik wok bilong PNGNRL. Em bai no inap long kamap opisal o trena bilong olgeta tim i stap aninit long Digicel Kap resis.

"PNGNRL i laikim tupela pilaia bilong ol Eagle, Francis Ray, husat i save pilaia namba 10 na kepten, Junior Rau, i save pilai namba 4, long malolo insait long 10-pela yia. Na tu, insait long dispela 10-pela yia, tupela bai no inap long kamap opisal bilong wanpela tim aninit long ol PNGNRL resis, nogat."

Hondina i tok moa olsem,

ol PNGNRL i bin givim sampela sas egensim Akinu na Rau, na dispela em i hevi bilong ol polis long stretim.

Long wankain taim, PNGNRL Bod i sasim 4-pela pilai bilong ol Guria, Francis Panui namba 6, Samuel Hamari namba 10, Lucas Kapinias namba 14, na Adrian Baungus namba 16, bikos ol i brukim lo bilong ol pilaia egensim ol lain i lukim resis. Wan wan pilaia bai baim K5000 bipo long 2017 Digicel Kap resis bai stat.

Na tu, ol i bin rausim ol long 5-pela gem bai kamap pas long 2017 sisen.

Ol Bod bilong PNGNRL i yusim vidio bilong TVWan wantaim ol narapela ripot long kamap wantaim ol dispela disisen. Na ol i salim dispela vidio i go long ol polis long lukim na mekim wok painimaut, sapos ol i laik.

Sapos, sampela i no pilim orait long ol disisen bilong ol Bod em ol i ken apil egensim ol dispela disisen aninit long stretpela rot bilong mekim apil.

Ol Pepe i redi long Nesens Kap resis

OL Papua Niugini Pepes i bin lusim kantri long las wik Sarere na i go long Singapore bilong resis long Nesens Kap resis.

Kosa bilong ol Pepe, Unaisi Rokoura, i tok, ol i bin mekim wok redi long tripela wik i go i bin kamap namba wan na ol gel inap long resis gut we ol bai no inap long kisim wanpela bagarap.

"Ol gel i bin givim planti taim long trening bilong resis long Nesens Kap. Mipela bai lukluk long ol plen bilong mipela na bihainim olgeta skul toktok long taim bilong resis bai kamap," Rokoura i tok.

"Ol Pepe i makim long pilai gut na i winim Nesens Kap bihain long ol i bin pinisim namba tu long Nesens Kap long yia i go.

"Mipela i gat yangpela na ekspiriens pilaia wantaim na i gat moa strong na redi long resis. Mipela olgeta i lukluk long salens na mekim PNG i amamas."

Nesens Kap resis i bin stat long Septemba 4 i go inap long Septemba 10.

Ol kantri i resis em, Botswana (19) na Zambia (16) long Afrika, Canada (18) long Amerika, Singapore (17) long Asia, Aila 18 long Yurop na Papua Niugini (25) long Osenia.

Digicel Kap sisen i kamap namba wan

RESIS bilong Digicel Kap long dispela yia i kamap namba wan we ol i bungim pinis bilong resis long Septemba 3, 2016.

Edministreta bilong Papua Niugini Nesenel Ragbi Lig (PNGNRL), Stanley Hondina, i tok, bikpela salens long dispela yia em ol i bin senisim ol fomet bilong dro na dispela i soim olsem resis i senis long pul sistem i go long raun ribon.

"Mi ting olsem ol pipel bilong dispela kantri husat i save laikim ragbi lig i amamas long dispela senis olsem ol i gat sans long lukim olgeta tim i pilai long dispela resis long ol wan wan taun bilong ol," Hondina i tok.

"Mi laik tok tenkyu namba wan sponsa, Digicel, na namba tu sponsa, SP Brewery, bilong sapot yutupela i givim long ranim dispela resis. Long taim mipela i bungim taim nogut long

ekonomi bilong mipela, tupela sponsa i sanap sambal long dispela spot na dispela i soim olsem tupela sponsa i givim inap taim long spot long dispela kantri."

Hondina i tok tenkyu tu long ol wan wan klap tim long sapot ol i givim bilong mekim dispela resis i kamap long mak. "Sapos, yupela ol tim i no stap, dispela resis bai no inap stap yet long ol yia i go," Hondina i tok.

"PNGNRL i tok tenkyu long ol risos na taim bilong ol wan wan klap i bin givim long winim mak bilong dispela resis na mipela i lukluk long wok klostu wantaim yupela inap long sisen i kam.

"Mi tok tenkyu tu long Bod Siaman, Mr Sudhir Guru, long givim inap taim long strongim dispela resis long stap yet. Wantaim strongpela spot i kam long ol bod memba, mipela i pinisim gut resis bilong dispela yia, na dispela

em i wanpela samting we mipela olgeta i ken amamas long en," Hondina i tok.

Resis bilong dispela i kamap long mak gut bikos ol referi i stap long baksait tu.

Long olgeta wik, ol referi i no misim wanpela gem, nogat. Dispela em i hat wok tasol ol referi i mekim gut.

"Mipela i tok dispela yia em i laspela yia long mipela i kisim referi long Kwinslan Ragbi Lig (QRL) long ranim gem na 2017 gren fainel em i namba wan yia bilong mipela bai ranim gem mipela yet. Tasol, asua i kamap long semi fainel na ol referi i les long kam na olgeta lain i amamas long toktok long dispela i wanpela sans we mipela i inap long ranim gem mipela yet," Hondina i tok.

"PNGNRL i tok tenkyu long ol lain husat i stap wantaim long kamapim dispela resis i namba wan tru."

Ol Hunter i lus long eliminesen fainAl

SISEN bilong ol Papua Niugini SP Hunter i kam long mak bihain long ol i lus long eliminesen fainal, 18-12, egensim ol Sunshine Coast Falcon long Nesenel Futbol Stediam long las wik Sande.

Ol Hunter i bin winim olgeta 11 gem i kamap long Nesenel Futbol Stediam long taim bilong regula sisen, wantaim ol i bin daunim ol wankain birua tim wantaim 30 poin long tupela wik i go. Tasol ol i lus long namba wan fainal resis i kamap long asples.

Kosa bilong PNG Hunter, Michael Marum, i tok, namba wan tim i win long taim bilong resis.

"Mipela i no bin pilai gut long namba wan hap bilong resis na long namba tu hap bilong resis, mipela i traim long pilai strong, tasol planti asua i kamap. Mipela i wok long pundaunim bal na mekim rot bilong ol Falcon," Marum i tok.

"Ol Falcon i disiplin gut wantaim futbol. Ol i wok hat na winim olgeta takol na strongim banis bilong ol.

"Mipela i no pilai gut long asples bilong mipela. Mipela i kilim tingting bilong ol sapota, sponsa na olgeta lain bilong mipela, tasol dis-

pela em i wanpela samting we mipela bai lainim gut.

"Mi bin tokim ol boi long malolo taim we mipela i gat 40 minit i stap long winim dispela gem na yupela i no ken wari long gem bai kamap long wik i kam bikos mipela i no gat narapela gem. Dispela em i wanpela gem na sapos mipela i winim dispela gem em mipela bai go het long narapela gem, tasol em i no de bilong mipela," Marum i tok.

Ol Falcon i stap pas, 6-4, long namba wan hap bilong resis, na ol i strongim ol yet inap long pinis bilong namba tu hap bilong resis long winim ol Hunter.

Na tu, ol Falcon i namba wan tim long daunim ol Hunter long asples bilong ol long dispela 2016 Intras Supa Kap resis.

Ol Falcon i bin skruim skoa bilong ol i go antap long 10-4 long namba 55 minit taim Samuel Wright i putim wanpela trai long wing.

Ol Falcon i bin painim trai lain gen we pilaia bilong ol, Ryley Jacks, i ran i go insait long wanpela gep na putim trai aninit long gol pos.

Joe Stimson i bin kikim konvesen i go insait long skruim

skoa i go antap long 16-4.

Ol Hunter i pait strong long namba 66 minit na winga bilong ol, Butler Morris, i bin putim namba tu trai bilong em long dispela resis.

Ol Hunter i kisim moa strong bihain long dispela trai, tasol ol Falcon i luksave long strong bilong ol Hunter na i painim rot long skruim skoa bilong ol.

Ol Hunter i mekim wanpela asua na referi i givim wanpela penelti egensim ol klostu long gol pos na Stimson i no wetim taim long kisim tupela poin long dispela penelti. Skoa i sanap olsem 18-8 bihain long konvesen kik.

Ol Hunter i pait yet taim 6-pela minit i stap yet na long namba 77 minit, Morris i putim namba tri trai bilong em, tasol olgeta konvesen kik bilong tripela trai i no go insait na ol i lusim 6-pela poin.

Tasol, Falcon i strongim banis bilong ol gut tru long las minit long winim resis na i go antap long namba tu wik bilong ol fainal bilong 2016 Intras Supa Kap resis.

Ol Townsville Blackhawk i daunim ol Easts Tiger, 46-4, long narapela eliminesen gem long Sande.



Blend Abavu i traim banis bilong ol Falcons long semi fainel pilai bilong long NFS long Mosbi.



Fowad bilong Rabaul Gurias i traim long brukim banis bilong Lae Tigers taim ol bung long gren fainel bilong Digicel kam long Pot Mosbi.



Bikpela fowad bilong Lae Snaex Tigers i bungim stret strongpela banis bilong Gurias. Tigers i winim Digicel kap long nam-bawan taim.



Puara, i traim dami bilong em tasol ol Falcon i putim gut tru was long em.



Rabaul Gurias tim kisim prais bilong ol.



Winga bilong Rbabaul Gurias i traim long rulim lain long pilai bilong ol wantaim Lae Tiger long Digicel Kap gen fainel.



Winga bilong Hunters Staron Amen i sait step long pilai bilong Falcon.



Strongpela senta bilong Hunters Justin Olam i traim long putim pilai bilong Falcon wantaim gol long trai lain. Falcon i pilai strong long dau-nim Hunters long go insait long semi fainel bilong Q kap.



Kepten bilong Lae Tigers i apim tropi bilong Digicel long namba wan taim, na Minista bilong Sports Justin Tkatchenko, Siaman bilong PNGNRL Sudhir Guru na Digicel Sponsaip Menesa Jayleen Morris i lukluk.



Tim Lae Tigers i amamas long winim Digicel kap long namba wan taim.



WHITE TUNA FLAKES
DIANA White



Manufactured by:
RD Tuna Cannery Ltd.

WHITE TUNA
insait
K 2.20



Tasty and Flavourful White Tuna for Everyone!

Etletik PNG i tok aut long program bilong PNG Gems

ETLETIK PNG (APNG) i tokaut long program na ol rul bilong PNG Gems bai kamap long Kimbe, Wes Nu Briten Provins, long Desemba 5 i go inap long 10 bilong dispela yia bihain long Spot Teknikel Edvaisori Komiti bilong PNG Gems i tok orait.

Ol etletik i bin kamap long namba tu wik bilong Gems na ol bai yusim dispela wankain taim tebel na ol taim tebel bilong 2012 na 2014 resis.

APNG i tokaut klia long ol rul we wan wan provins na wan wan etlit bai bihainim na pilai.

Presiden bilong APNG, Tony Green, i tok, planti asua i kamap long ol provins bikos ol i givim aut rong entri fom na dispela i larim spes bilong tupela etlit long ol wan wan iven.

“Wan wan provins i mas makim tripela etlit long resis long hap marathon na ol narapela resis tu,” Green i tok.

“Tripela etlit bai resis long riley na long ol narapela iven tu. Dispela bai tripela trek o fil iven, o tupela wantaim bai bung resis.

“Rul bilong PNG Gems i tokaut olsem i no gat wankain etlit bai reis long olgeta tripela raning iven olsem 100 mita, 200

mita na 400 mita resis. Dispela rul i kamap bikos ol bai mekim 4-pela raun long 100 mita na 200 mita resis na tripela raun long 400 mita resis.

“Dispela em i bikipela hevi we ol etlit bai no inap long resis long olgeta raning iven, tasol ol i ken resis long tupela iven bilong ol tripela raning iven,” Green i tok.

Green i toktok tu long polisi bilong APNG long mining bilong ol namba wan etlit na ol i ken resis long Gem.

“Lukluk bilong mipela i stap long ol resis bai kamap bihain long ol yia i kam olsem 2017 na 2018 Komonwelt Gems.

“Mipela i laikim olgeta etlit skwat bilong kantri i mas i gat inap sans bilong resis long PNG o long ol narapela kantri.

“PNG Gems em i namba wan long planti bilong ol etlit skwat bilong kantri i no save kisim inap sans long resis, tasol mipela bai larim ol long resis. Na mipela bai givim liklik sans long ol etlit husat i gat inap sans pinis long resis.

“Ol dispela namba wan etlit em Olimpik etlit, Toea Wisil na Theo Piniau, Rellie Kaputin, Donna Koniel, Peniel Richard, na Adrine Monagi.

“Planti bilong ol dispela namba wan etlit bai stap long narapela kantri long taim bilong Gems, tasol mipela i tok klia

long olgeta lain i mas save,” Green i tok.

Em i tok moa olsem, ol etlit long Niugini Ailan Rijon bai gat sans long mekim wok redi long resis long Gems long Rijonal Sempionsip bai kamap long Kokopo, Is Nu Briten Provins, long Septemba 27 i go inap long 29. Rijonal Sempionsip resis bilong Momase na Hailan bai kamap long Lae, Morobe Provins, long Oktoba 1 na 2.

“Rijonal Sempionsip resis bilong Sauten Rijon bai no inap kamap long dispela yia. Tim Oro bai no inap go long Pot Mosbi, tasol ol bai go long Lae long resis.” Green i tok.

Etletik resis long Kimbe bai stat long Mande, Desemba 5 wantaim ol semifinal bilong 400 mita hadel, 100 mita hit, sampela longpela distens resis na kwalifai hit long 4*400 riley.

Long Fraide, Desemba 9, las ful trek na fil resis bai kamap, na hap marathon resis bai kamap long Sarere moning.

Ol bai no inap larim ol etlit i gat kris-mas aninit long 17 yia long resis long hap maraton.

“Ol taim tebel na rul i stap long Etletik PNG websait o yupela i ken askim long dispela email edres, png@mf.iaaf.org, long lukim,” Green i tok.

TRAI TAIM: SP PNG Hunters winga Butler Morris, i redi long go daun long putim trai taim ol bungim Falcon long primineri fainal. Hunters i go daun long Falcons 14-8. Hunters nau i hagamapim su bilong 2016. Poto Nicky Bernard



ISUZU N-SERIES

the Perfect Business Partner.

